



15
1301
13



門 15
號 1301
卷 13

唐文拾遺卷之四十

榮祿大夫三品頂戴前分巡廣東高廉道加四級臣陸心源輯

崔致遠

行墨勅授散騎常侍牒詞

以下行墨勅牒

勅淮南節度鹽鐵轉運等使東面都統兼指揮京西
京北神策諸道節度兵馬制置等使牒某官乙右可
檢校右散騎常侍餘如故如將軍須言員外置同正
員牒准今年二月九日詔應諸州有功刺史及大將
軍等如要勸獎者從監察御史至常侍便可墨勅授
訖分折聞奏者大君降命元帥從權但云能立勤勞

昭和十一年
二月十四日
購求

特許先申獎勸漢祖則手無刊印不阻論功武侯則
心若懸衡必能舉職用示軍中之賞式資闕下之恩
前件官夙蘊壯圖久從戎事將救奔沈之患固憑擒
縱之能桓榮祖之馳名不唯馬稍周盤龍之受爵允
稱貂冠事須准詔授檢校右散騎常侍仍具申奏并
牒知者故牒

廣明二年六月十二日使兼都統檢校太尉平

章事燕國公授盱眙鎮將鄒唐御史中丞

牒准詔云云將軍分闔大夫出疆可專未請之權况
奉已成之命高懋懋賞用報奇功前件官術繼白猿

名齊赤兔夙歸信義備察忠良雖遷柱下之官尚謙
軍中之望宜昇專席更勵枕戈爾其心保清廉好對
暎淮之月力誇驍銳無慙破浪之風事須准詔行墨
勅授御史中丞

楚州刺史張雄將軍

牒准詔云云見功必賞漢高祖之殊恩承制無疑鄧
司空之故事前件官材標落落韻稟錚錚自假使符
已揚政績理股肱之名郡登耳目之高官信義相從
功名愈振仁擅外臺之寄宜昇大樹之資爾其益勵
忠規仰銜成命用副劉弘之善舉無嗟李廣之難封

事須准詔行墨勅轉授右武衛將軍員外置同正

授高霸權知江州軍州事

牒准詔應諸州刺史如有軍功卿量加爵賞如有罪犯卿宜書罰別差人知州具狀申奏者大元帥之權既資成命古諸侯之任宜選良才前件官蛟躍池中虎蹲岸上用軍以義守節唯忠不辭白刃之危累挫黃巾之眾或短兵鬪勇或圓陣呈奇動有所成往無不利今以九江闕牧一郡思春將活疲甿固憑幹吏爾其遏強撫弱削弊蠲苛無登庾亮之樓空知翫月好把袁宏之扇且學移風稍展政聲仁沾恩命事須

准詔行墨勅差知江州軍州事仍具事由申奏并牒知者

許勅妻劉氏封彭城郡君

牒奉處分古者官至大夫室稱命婦遂有從夫之貴乃爲處世之榮而況靜則能慎內言動則克從外役躬環甲冑志凌雪霜功名既異於常流封拜豈拘於成命以滁州刺史許勅妻劉氏英才天授貞節日彰平欺後魏將軍洛陽失行仰慕聖朝公主司竹興兵一昨專命良夫討除叛卒遽陳丹赤固願同征手驅組練之羣遠攻城壘身脫綺羅之色久犯氛埃四德

有餘六韜可試豈獨家之肥也實謂邦之媛兮夫既冠其銀鍤婦宜榮於石窳豈可使松標峻影早致凌雲蘿抱柔姿猶嗟委地先行茂賞用報前功軍中之命爵策勳與人從欲天上之錦賸鈿軸待鳳銜來事須准詔行墨勅封彭城郡君仍表次錄奏并牒知者

請節度判官李縮大夫充副使

以下舉牒

牒大夫天芝稟秀霜桂含貞蔚爾芳猷每見用和爲貴凜然直氣終能嫉惡如讎信知賢良實救凋弊頃者再握一同之政曾標三異之名旣發縣花仁分郡竹而乃鷓鴣自滯羔雁相從鉅野早棲劔川遠役察

俗而唯資婉畫犒師而不乏豐儲果得入奏玉墀出懸金印洎某暫臨江陸旋鎮海門永言移節之難成假運籌之妙一來淮甸四換星霜判官德以潤身固爲已任恩能濟物不欲人知莅事實繁在公匪懈筆直而吏多畏色鞭輕而獄絕冤聲見君子之盡心實古人之用意十二年之弘益久而彌芳千萬里之追從永以爲好雖將徐榻別致猶恐燕臺未高今已假小秩宗兼大司憲不遷職位何稱官榮幸屈跡於副車冀揚威於戎幕陳寵宣詔條無失嘗賴功曹呂虔致郡俗永安亦憑別駕若言今日彼在下風事須請

攝節度副使表次錄奏

請副使李大夫知留後

牒大夫劔橫天外珠媚水中雄稜則仰決浮雲溫潤
則旁無枯草深藏利器久佐遠藩每施婉婉之謀共
化蚩蚩之俗五鎮相倚一紀於茲嘗於折獄按刑唯
遵直道縱至旬休節假不離公門敢言知己之難實
荷成人之美今已三年翫寇尙恣侮張十道徵師遞
相逼撓若不專征鈇鉞何因倒載干戈遂驅養勇之
鋒仁破稔奸之窟代行拙政留託長才慰八郡之疲
羸察四鄰之助勦冀使袁宏黎庶麤識詠哥無令陶

侃賓僚只耽閑戲數年卧理今日出行皆資禪助之
功聿保始終之惠事須請知觀察留後

請高彥休少府充鹽鐵巡官

牒少府學麟成角詞鳳傳毛偶輕桂客之遊暫樂梅
仙之侶鶴唳而月籠寒野萬里清音鵬飛而雲鯨長
天九霄高躅幸聯宗黨得接徽猷敢興念於維駒無
見辭於絆驥稍假縱橫之術終匡幹運之權雖慙燕
國之金臺願接謝家之玉樹同姓必親於異姓今人
何讓於古人事須請攝鹽鐵巡官表次錄奏

請泗州于濤尙書充都指揮使

牒尙書洞究儒經宥探武緯指清途於萬里牧遠羣
於三年旗看隼飛軻待鹿挾慰疲毗以仁政捍寇盜
以智謀克歸合浦之珍曾散曲堤之眾今者徐戎遺
燼敢恣侵凌楚卒精鋒伫期埽蕩終免致包胥之哭
況非奪晉鄙之軍但以鷹犬呈功能熊羆就列須俟指
揮之命仍申搏噬之能實託威權遠希統攝俾瞻馬
首皆知進退之宜永滅梟聲用審否臧之律事須充
都指揮使其應援諸都及甯淮盱眙淮陰等三鎮將
士悉受指揮

王棨端公攝右司馬

牒端公烏衣茂族鶴警清流早列官榮頗精吏術口
中金石常聆直韻之高手下銅鹽曾展長才之妙事
既同於外舉理無愧於旁求今則秩挂方書職參典
午雖云承乏且欲試能憲府威稜他日見豺狼懾伏
郡庭閑散此時樂魚鳥留連事須差攝右司馬

右司馬王棨端公攝鹽鐵出使巡官

牒奉處分且權筦之設也本資戎事將贍軍須既當
薄伐之期實藉均輸之利能成重務固選良才端公
韻振維山慶流淮水靜處五常之域勤尋六義之門
每覽緣情備知守節繼委當仁之任皆傳幹吏之名

已爲歷試諸難可謂多能鄙事今以仰禪國用旁濟
兵儲權課方殷句稽匪易官居典午旣已優閑志在
推公無辭冗屑仵縻幕職立展籌謀雖見王晞長寄
心於方外何妨裴楷暫勞力於俗中事須請攝鹽鐵
出使巡官句勘當司錢物

前邵州錄事參軍顧玄夫攝桐城縣令

牒前件官善水無壅謙山自高腹飽詩書口含鋒刃
厚利唯勤於耕道閑情素嬾於釣名爲疎奔競之門
尙處卑棲之地旣能潔己何惜愛人州主簿之提綱
昔嘗留意邑大夫之製錦今可呈功永言不憚勤勞

方謂克承闕乏稍念時危而慎守勿云俗弊而難除
一門多詠雪之才眾推儒慶百里渴象雷之理勉振
政聲事須差攝舒州桐城縣令

海陵縣令鄭杞

牒奉處分字人之政爲吏所難欲俟三年有成固須
一日必葺永言委任實藉賢能前件官深於詩敏於
行不近劉輿脂膩唯資謝朓膏腴累假一同備彰三
善睠彼東吳之近境實爲南兗之奧區昔也承乏多
勤去思猶在今可以舉舊令尹之政修真君子之誠
均調政刑遍慰黎庶展驥終希於得路割雞無憚於

發劄行乎敬哉勿墮乃力事須請攝海陵縣令

前宣州當塗縣令王翽攝楊子

牒奉處分宰字之術若驅羣雞緩之則散急之則亂此言雖小其理甚中知者非難行之不易況乃隋城近邑楚岸通津螟蝗則久待消除蠃鮒則每思養育前件官相門積慶儒室推賢早登廉孝之科嘗歷句稽之任雖棲下位不墜令名果逢連帥之知再假字人之秩雉誰忍補鵠自停喧陶潛之腰腹慙口孔奮之膏腴下潤今以楊子一同繁劇四達要衝每當使命交馳實託宰僚勤幹遂重責成之寄況逢多事之

秋而乃有令患風請告踰月若言考秩亦合替移固選長才俾修闕政其在上瞻夏日下視春冰宜無憚於徒勞仁有成於厯試苟有經年沈醉必虧蒞事之能如將終夕清談亦失相時之理勉於二說慎自三思事須差攝楊子縣令

柳孝讓攝滁州清流縣令

牒奉處分今世之獎邑大夫也多以河陽花彭澤柳爲美事永言至理我則不然唯某在其視人如傷潔已以仕能懷冰蘖之操迴掩花柳之名實難其才得副吾意前件官展禽苗裔言偃政能曾宰濟陰克安

屬邑久依江徼靜守窮居數年而雖甚食貧直道而未嘗改節今將歷試俾假缺員無與喧鵠之譏勉致驅雞之術事須差攝滁州清流縣令

前浙西館驛巡官鄉貢三傳張咸又攝山陽縣

丞

牒奉處分前件官族資鵠印業練麟經未躬壯圖嘗從碎職既精簡牘之事寧辭州縣之勞習傳之體有三能詳正義在公之心無二宜慎爾官往矣敬哉賞罰斯在事須差攝山陽縣丞

前婺州金華縣尉李涵攝天長縣尉

牒奉處分夫縣尉之設也其官雖卑其務甚重動則推詳滯獄靜則慰撫疲甿是以佐僚能憚其直聲宰尹亦懷其畏色永言至理實繫長才前件官性習五常身資一命嘗佐金華劇邑頗傳玉潔高名久見退修誠思進取俾助養蠲之政且昇化鮪之資其在藁作朝餐冰為夕飲高懸曹棒靜和宓琴譽能息於鵠喧勢必登於鴻漸云云

前潁上縣主簿鄭綬攝盛唐縣丞

舅韋絨評事薦

牒奉處分凡城一邑皆列六曹雖云具體而微豈可從心所欲況縣丞之佐理也令長憚其糺摘猾吏稟

其規程苟能自強何患不立前件官康成求己季智
奉公會申穎上之勤勞遂見渭陽之論舉桓譚貳政
且宜肅彼奸豪殷浩吟詩無用傷其貧賤事須差攝
壽州盛唐縣丞

諸葛殷知權酒務

牒奉處分權酤之權起於漢代會計之利著在周經
既當預備闕懸難可不從改作將成重務固選良才
前件官隱豹含章卧龍襲慶潔己則隋珠無類在公
則庖刃有餘昨分孔僅之重司已成歷試今躡魯匡
之良策何憚專勤無辭鄭驛之卑棲早致卓爐之餘

利能資美祿必贍雄師所期百姓無譁非阻三軍告
醉事須差攝館驛巡官專知權酒務

李昭望充奉國巡官

牒奉處分昔孔子誠伯魚學曰其先祖不足稱其族
姓不足道然而大以流聲後裔者豈非學之所致乎
若然則先祖之與族姓也不唯時世所榮亦乃聖人
所重前件官搢紳上品結綬中朝方襲芸香遽飄蓬
跡遠逃虎口猶絆驥蹄今以一言爲賢三代可數但
□□渭陽之族坐振重名漂流淮徼之居來求碎職
遂茲響應用試才能既知各有司存唯在聿修厥德

事須補充楚州營田奉國巡官

柴巖充洪澤雨塘巡官楚州營田

牒奉處分三農就稔一概推功苟非口降雨之渠何以致如雲之稼俾無隳惰固藉專勤前件官壯志不渝公才可任承乏而善參軍事慎終而益見吏能今以洪澤近封雨塘美號徵小喻大昇高自卑爾其靜勛冰心潛窺水脉勉稟龔黃之令遠繼田曹無慙鄭白之名有虧地利高懸賞罰用試否臧事須差充楚州營田院洪澤雨塘專知官

許權攝觀察衙推充洪澤巡官

牒奉處分撫俗所先勸農爲最是以鄭渾則奪其獵具温嶠則請置田曹仰順天時俯徵日力俾督耕夫之業須憑幹吏之才前件官歷試已多忠勤可獎令尹之功成製錦督郵之政克提綱但承闕乏之時皆有緝綏之譽今以山陽沃壤淮畔奧區地占三巡田逾萬頃非乏決渠爲兩尙虧多稼如雲蓋爲編毗不勤功於蔗葦縱當稔歲皆失利於稻粱知爾奉公勸民務本若使耰而不輟必期敏則有功委以農時假之使職永言從政實可與權無取潤於膏腴苟徇私於毫髮勉施乃力廣諭眾心事須差攝觀察衙推充

洪澤巡官兼都巡勘指揮奉國謝陽等巡務者

王榮端公知丹陽監事

牒前件官蹈冰守節飲水安貧靜吟而篋有新詩寂坐而門無雜客卓爾君子宛然古人今以將濟軍須誠資吏術少輟琢磨之業俾專鼓鑄之權想夷甫之不言無虧祖德思仲宣之未遇勉俟官榮事須差知丹陽監事

臧澣知鹽城監事

牒奉處分若官無直道則利有多門凡歷任於牢盆或咸資於潤屋而乃就此繁劇守其潔廉心珠則不

惹脂膏智刃則能分髓髀嘗聆斯語罕覩其人前件官雅淡裝懷清勤縮務嘗握由拳之權課唯遵止足之規模休替未遙功勞可驗更資歷試必濟重艱展才於近監之鄉守節於作鹹之地不須對雪空中吟謝朗之詩只在熬波言下見張融之賦事須補充權糶使巡官知鹽城監事

趙詞攝和州刺史

牒奉處分昔張緒子充少好遊獵右臂鷹左牽犬緒見而謂曰一身兩役無乃勞乎充跪答曰丈夫三十而立今二十九矣請至來歲緒曰過而能改顏氏子

焉其後折節修身終爲賢達則古之豪俊今可規模
前件官脫跡迷途投身義路永除惑志可獎俊容旣
能資父事君是得居官理務俾參上佐用試忠誠況
當口榮之時好縱安居之樂詞其勉輸後效善補前
愆已銷九族之憂無起一朝之忿事須差攝和州刺
史

淮口鎮將李質充沿淮應接使

牒奉處分用兵之難擇利而動不論遠者近者須賴
倚之角之在安思危有備無患前件官名超廣利勇
繼雄飛自提外戍之軍每審中權之要彼徐寇以屢

侵吾圍莫戢其鋒急之則鼠竄彭墟緩之則豕豕楚
岸遂徵眾旅俾剗羣兇豈從援溺之權將助焚枯之
勢爾其指呼順命擒縱成功終令入海之波偏能流
惡乃使映淮之月早見洗兵茂賞高懸良時倏往勉
思委寄勿負利終事須差充沿淮都應接使便仰量
出兵士討除賊徒

淮陰鎮將陳季連充沿淮應接副使

牒前件官勇於戰賊樂在從軍操戈而只待春喉發
箭而曾無曠日自居遠戍久練雄兵每聆捍蔽之勞
能息奔衝之患今則未殲彭孽猶役楚軍將資首尾

之權是成蛇陣固藉爪牙之利共展豹韜爾其跡脫
伍符身居貳職專防險道佇靜長淮雖云迴遶之川
未是縈紆之地坐思前哲猶傳胯下之蹤立取奇功
好豁胸中之氣勉期竭節實謂逢時事須差充沿淮
都應接副使便仰量出兵士討除賊徒

宋再雄差充水軍都知兵馬使

牒奉處分舟楫施利干戈騁威自古爲難在今所急
固托縱橫之略始成捍蔽之功前件官學劍有成彎
弧自許嚼彘而當年逞俊曳牛而是處爭雄高列軍
門深遵義路久居江戍妙練舟師今以泗上流災淮

中聚寇旣犯觀風之境頗昏暎月之流爾其總握雄
兵遠張祕策陸殲蛇豕水截蛟螭早令賊壘皆平永
使驚波不起用官物而討官賊吾不爲難探虎穴而
拔虎雛爾當自勛事須差充水軍都知兵馬使部領
諸兵馬討除淮內賊徒

蘇聿補衙前虞候

牒奉處分古之有言以小諭大則祁奚之請老也旣
當問嗣能自舉親情不涉於阿私事何妨於委用前
件官早從吏役久習武才父也暮年旣思休退子之
壯氣可代勤勞且令職在於早趨乃欲功歸於歷試

無爽聿修之訓勉成負荷之規事須補充衙前虞候

曹威轉補散兵馬使

牒前件官勇而好禮勤以從戎比者逞陳眾之言詞傳郭維之訊問果驅險浪皆赴順風尋值沛戎來侵楚壤首登鶴列深挫豺牙摩壘而每能率先殷輪而不欲言病忠誠勵已壯節驚人今則郡守論功材官受賞俾昇峻級用報前功事須轉補散兵馬使

許勅授廬州刺史

牒奉處分良二千石古難其人屬郡之中吾有所試勤修靜理今得人焉前件官自舉六條已踰四載邑

無吠犬境絕飛蝗外令邱井又安內致閨門肅睦政聲則有口者歌詠仁譽則無翼而奮飛遠達宸聰果霑殊寵美秩已題於龍劍雄威愈振於隼旟旣銷滌水之災來作廬江之福分憂救瘼能諧聖主之心紅旆碧幢豈落他人之手事須准勅授廬州刺史

孫端權知舒州軍州事

牒奉處分昔李弼有言大丈夫生世須履鋒刃以取功名安可碌碌依階求仕是乃蓄志能壯謀身克成夕脫羔裘朝驅熊軾不慙往哲其在茲乎前件官族繼興公術傳武子能揚俊氣久練雄師常安乞乞之

徒果就循循之誘今則委之郡政試以公才既逢豹
變之秋善守龍舒之境爲邦致理必見三年有成向
國輸忠勉令百姓無患卽迎帝賞更峻官榮事須差
權知舒州軍州事

朱鄴補討擊使

納助軍錢遂加職賞

牒奉處分漢有卜式者輸家財助軍費遂乃出自牧
羊豎子終爲司憲大夫忠誠所施其利甚博前件官
石非硤硤鐵實錚錚知義重而財輕願忘家而報國
天龍地馬不藏私室之中尺籍伍符可列軍門之下
俾昇峻級以諷頑毗既有賴於金多無自驚於銅臭

事須補充討擊使

郝定補衙前兵馬使

能手射七十步

牒奉處分弧矢之利武藝所先號猿而永播嘉聲落
鴈而能傳妙技況乃只憑五指能代六鈞豈唯邁古
超今可謂神功聖術前件官早攻手射善應心機不
彎三百斤弓能發七十步箭紀昌若見必想發弦呂
布相逢固慙撻箬旣抱非常之伎佗成可久之功換
滑臺之舊資陟隋苑之高級事須補充衙前兵馬使
客將哥舒璫兼充樂營使

牒前件官動彰毅勇靜保謙冲早成學劍之功不墜

卷四十一
為裘之業頗經歷試無怠聿修久委賓司既見與言之可使俾兼樂職必期飾喜之克諧爾其有禮為先無荒是誠迎送於燕臺鄭驛指蹤於迴雪遏雲勿使英賢或發養痾之誚須令艷麗先緘笑蹙之聲事須兼充樂營使

王處順充鹽城鎮使

牒奉處分夫藩鎮之為制也中屯銳師外列諸戍用備腹心之患固憑爪牙之勤前件官深蘊壯圖挺生勇氣姜維若在未占雄兒焦度相逢應饒健物每展報恩之節累申伐叛之功眷彼鹽城居於海岸苟或

一同失理實為四遠多虞遂徵處順之名俾守防奸之任爾其效勇夫之重閉致危俗之安居暫固封疆無念及瓜之限但逢寇孽勉揚破竹之聲事須補充鹽城鎮使

張晏充廬州軍前催陣使

牒奉處分師克在和兵貴在速若許緩其善陣誠為挫彼奇鋒用之則行時不可失前件官志能傳略名可止啼待逢盤錯之難願展縱橫之術今則舒猶叛楚衛已伐邢兩雖潤於興師雲未銷於結陣遂使魚麗猛勢阻埽氛埃蟻聚頑徒敢安窟穴爾其驅之以

馬箠訓之以豹篇事唯託於一麾功必成於百勝將
迎軍賞佗送捷書事須差充廬州軍前催陣使

歸順軍補衙前兵馬使

牒奉處分前件官身榮豹飾志習龍韜奮心於擊鼓
其鏜騁力於挾軻以走早歸信義無憚勤勞去正寇
據屬城兵徵諸郡共殲微孽各誓前驅既遵令於牙
璋宜陟名於甲騎聊遷職秩用報軍功爾其勿替忠
誠更邀上賞事須補充衙前兵馬使

安再榮管臨淮都

牒奉處分西魏王羆率眾拒寇乃杖白挺大呼而詬

曰老羆當道卧糴子那得過敵見威勇果自驚奔則
知猛將之名能奪叛徒之魄前件官夙精韜略歷試
機謀嘗犯重圍決成獨戰實可謂神出鬼沒豈唯口
左旋右抽今之武力雖衰壯心益勵臨事而猶能強
飯卽戎而寧欲素餐蠢彼頑兇騷然侵擾雖徵眾旅
未建奇功眷彼臨淮處於要地其在訓之以三令激
之以一呼審詳於彼竭我盈成就於先難後獲老驥
免嗟於伏櫪無令駑馬爭先秋鷹既遂於下韝勿使
妖狐得便事須差管臨淮都

呂用之兼管山陽都知兵馬使

牒奉處分仲尼云寬則得眾信則任人焉嘗聆斯語
今見其人前件官慶襲玉璜業精金版遵直道而利
有攸往奉公家而知無不爲是以晉作新軍權資處
右齊行勇爵眾許居先乃裨察俗之規動叶安民之
策遂得晨羊罷飲夜犬停喧永除奸濫之源深得撫
綏之道今以屬城多難散卒無依窮猿旣切於投林
飛鳥猶思於擇木羣情所附戎略可嘉俾安其營
然來實倚其多多益辦無辭兩役用展長才事須兼
充山陽軍都知兵馬使

獬豸都將

牒奉處分凡標軍額須警眾心如指喻之非宜則訓
齊而何在況乃均霑好爵共荷殊恩跡雖限於柳營
秩盡昇於柏署宜加一等俾異三行前件官壯氣挺
生忠誠卓立曠弩則前無強敵荷戈則動有成功累
建戎勳遂霑爵賞今以狼星未滅鯨浪猶翻將申戮
暴之能用示觸邪之號爾其勉思一角永息二心
銷封豕之災勿失神羊之性事須補充獬豸軍都知
兵馬使

宿松縣令李敏之充招討都知兵馬使

牒奉處分昔來護者立性卓犖初讀詩至擊鼓其鏜

踴躍用兵羔裘豹飾孔武有力乃捨書歎曰夫人在世固當如是會因滅賊以取功名安能區區專事筆硯其後果申壯志累建殊勳則知奇才所爲何代不有前件官精詳吏道旁習戎機假百里之威則疲毗獲賴作萬夫之長則義旅知歸遂得縣道肅清鄰藩倚賴欲破蘄春之狡窟遙分江夏之兵權罷從役於驅雞仁承乏於建隼聊加職賞俾振軍聲是乃丈夫雄飛君子豹變勉驅甲騎遠應羽書旣設援於他邦必保安於吾國事須補充節度衙前兵馬使兼充西南招討都知兵馬使

張雄充白沙鎮將

牒奉處分升高自卑君子所以勵素志辭大就小古人所以傳令名但能守節不虧固在相時而動前件官密懷義勇深貯謙和頒條而政有嘉聲馭眾而軍無愠色今以新恩未降銳旅何安眷彼古津實爲要路是成鎮務乃在江壖旣居使府之要衝宜假公才而管轄况兼場貨可贍軍須且卷豹韜其養斬蛟之勇仁迎鳳詔別遷建隼之榮事須差權句當白沙鎮務兼知場司公事

安再榮充行營都指揮使

牒奉處分昔曹公爲樂府歌云老驥伏櫪志在千里
烈士暮年壯心未已今猶古也我得人焉前件官百
戰成功一麾出守曾安海俗永振風聲而乃不求更
握虎符唯願終申豹略豈覺老之將至每俟用之則
行今以大憝未殲外方多難諸藩命將無非竹簡探
名遠道徵師或是葵邱代戍苟虧忠勇何蕩妖兇遂
付重權伫觀奇策其在身先行伍顧指軍兵勉揚矍
鑠之名無致遷延之役時不可失往矣敬哉事須差
充行營都指揮使赴壽州西面備禦討逐黃巢徒黨
者

徐莓充權酒務專知

牒奉處分前件官發跡戎行研心吏道忠勤所至幹
濟可觀今則舉漢代之權宜搜杜康之利潤贍吾軍
用藉爾公才旣非若處先登無與眾人皆醉事須差
句當天長縣權酒務

柳孝讓知白沙場權酒務

牒奉處分前件官直道立身公途勵志學已窺室家
之富任曾致州縣之勞今以備食三行搜資六物豈
使弊歸於下只令利在其中勉稟條章早申績效俾
不欺於釀具無自陷於醉鄉事須差知白沙場權酒

務

行營都虞候

牒奉處分前件官勇而好禮敏則有功膂力甚強腹
心可委今以齊驅勁卒俾剗羣凶爾其糾摛行閒防
虞境外宜拘小節善事上官勿謂忠貞有乖輯睦能
成勤效不愆甄酬事須補充行營都虞候

曹鵬知行在進奏補充節度押衙

牒奉處分藩侯所任邸吏爲先能傳萬里之音不墜
九霄之命固憑幹濟方付重難前件官魯劇長材魏
仁雄族雖處干戈之列早閑刀筆之能遂使遠赴行

朝專司遞務覩六龍之仙蹕每審巡遊傳九鳳之王
言曾無阻滯以茲歷試深可獎酬今已秩亞憲卿官
昇典午身得趨於輦路職未稱於轅門俾假牙璋遙
分甲騎慎達上天之旨以安外地之心爾能竭誠吾
不愆賞事須改補攝節度押衙依前知行在進奏

朱祝大夫起復

牒奉處分事繁金革禮奪苴麻魯公制之於前晉侯
行之於後蓋乃從權順變是爲移孝就忠苟不忘家
將何報國前件官方從戎役每藉公才遽鍾風樹之
悲永違霜槿之養能勤泣血唯懼奪情然以羣寇未

殲列藩多事確執三年之愛仰辜萬乘之恩況承勅命指揮已許軍前驅使出如綸之睿旨既俟成功衣夫錦之格言豈同前哲時異事異念茲在茲揚名顯親竭力從命孝之終也往矣敬哉事須牒舉起復差往五嶺已來類會軍前公事

上都昊天觀

聲讚大德賜紫謝遵符充淮南管內威儀指揮諸宮觀制置

牒大德真璞混成靈源廣潤淘俗態於心水瑩仙姿於面冰蓬島神仙應待銜杯之樂茅家兄弟敢攀執袂之遊猶思救苦於寰中尚阻追歡於物外屬以陣蛇出穴戎馬生郊每勤齋敬之心深假護持之力達

聖聰而有謂施醮禮以無虧今則秦嶺煙昏難尋四老楚淮月皎幸伴八公但以桂苑繁華楊都壯麗既見星壇月殿處處荒摧難期鶴駕霓旌時時降會欲設精嚴之備須資揚統之權白馬將軍方役大朝之元帥青牛道士暫充下界之仙官比年既遂於攀留他日必同於輕舉事須請充淮南管內威儀兼指揮諸宮觀莊田等務

慶之辰莫不山靈供萬歲之歡聲河伯獻千年之瑞
色仰資聖壽敢設仙齋廣成子之微言旣傳眾妙華
封人之善祝實繫羣誠伏願德乃日新禱當天悔暫
興時雨遍洗妖氛高整鸞旗早迴鳳輦然後搜濟汾
之詠撰封岱之儀傳芳於玉葉金枝積慶於天長地
久使蠻戎率服蠹植咸蘇仰沐華胥之風齊登仁壽
之域普天率土永賀昇平

又

道士某乙言伏以父天母地帝道所以爲尊貫月繞
星靈符於是乎在况覩一人有慶固知萬壽無疆伏

惟皇帝陛下龍握丕圖鳳資聖紀播休聲於里社標
盛禮於高禩今者風調舜琴日緩羲轡曆草舒芳於
八葉丹陵降瑞於千齡謹設仙齋仰陳善祝伏願塵
銷九野波息四溟早迴西幸之儀便舉東封之禮一
千年之休運高建武功三十世之昌期倍延福祚允
諧大定永賀中興

又

伏以瀨鄉白鹿旣掛仙蹤函谷紫雲果資王氣積慶
於天長地久傳華於聖子神孫耀玉京而我李長春
演金籙而莊椿永茂伏惟皇帝陛下三無稟德萬有

覃恩叶感星夢日之祥掩四乳八眉之瑞上天降聖
爰乘解愠之風列土修齊況值宴陰之月伏願峒山
順軌汾水迴鑾迎萬歲之岩音歸九重之天闕享七
百年之休運寰宇中興守五千字之格言兵戈大定
仰祈玄鑒永護皇居

上元黃錄齋詞

年月朔啟請如科儀伏以有德不德無名可名自施
倏忽之功莫究希微之旨是以紫府乃修心可到玄
關非用力能開臣志慕真風躬行正道但以漢良前
筋猶勞戰伐之謀越蠡扁舟未遂優閑之望既榮人

爵須報主恩誓殲無賴之徒久練不祥之器動拘俗
役慮犯玄科今則節已及於上元災未銷於下界謹
修常醮仰貢微誠所願梟覆頑巢鳳迴仙駕帝座與
三台永耀王畿與九牧皆安雷驚而蟄戶全開風掃
而妖氛靜息俾臣靈根日茂至業天成虎符提闔外
之權終安澤國虹節指壺中之境得認家山臣無任
虔肅禱祠懇悃之至謹辭

中元齋詞

年月朔啟請如科儀伏以道本強名固絕琢磨之理
身爲大患深驚寵辱之機能審自然而然必知無可

不可是以雕詞贊美則乖妙旨於混成矯志求真則
爽奇功於積學冀標玉籍在守金科臣才謝半千雖
慙賢路心凝正一早扣玄關齋誠於八節三元鍊志
於龍緘鳳蘊但屬鯨翻逆浪蜮噴毒沙數年興蠹螫
之災萬姓抱瘡痍之苦三尺劔高提在手須救危時
六銖衣輕掛於身未諧夙願今謹因中元素節大慶
良辰依寶壇而醮設常儀企仙闕而拜申精懇伏願
真風蕩滌玄澤滂流吾君享萬歲於巖音賢相耀六
符於渭訣調舜絃之美化永復昌期漏湯網之兇徒
咸歸顯戮然後戴髮含齒鱗潛羽翔不知日用之功

各遂天成之樂俾臣代勳善繼眞位高遷留形於煙
閣雲臺縱賞於芝田蕙圃鑄金追想終榮聖主之恩
叱石閑遊得效仙人之術儻非過望敢不精修臣某
無任祈恩謝過虔禱懇悃之至謹辭

下元齋詞

年月日啟請如科儀伏以教資妙用無爲而無不爲
道在勤行不厭是以不厭苟得捧持三寶必能極護
萬靈須憑善建之根株始覩混成之闔闕故曰大丈
夫處其厚而不處其薄居其實而不居其華者也臣
雖塵役拘身而雲裝挂志大成是望上達爲期每依

郭璞詩中精調玉石願向葛洪傳上得寄一名所以
仰欽象帝之先豈在他人之後聽爛柯翁之說則倍
惜光陰覽抱朴子之言則不虧忠信但以卑稜俗累
深握兵符政刑之得失難調賞罰之重輕易忒暗推
懋咎莫補精修況叨真位之榮恐負玄科之責是以
三元八節顯醮遙祠唯期致力於九層未曾妨功於
一簣今則天吏扣應鍾之候水官攬玄轡之時月數
就盈日辰在望仰投靈地敬設寶壇備儀於琳几瓊
盤注想於金臺銀闕冀感通於良夕能濟援於危時
伏乞太上三尊十方眾聖曲垂玄鑒俾遂丹誠早迴

翠輦於長安復振皇風於正始秉陶鈞者永諧德化
仗節鉞者共戢兵戎波濤靜寢於四溟氛霧豁開於
九野樹下有推功之將草閒無求活之徒至於翔翼
躍鱗跂行喙息偕登仁壽之域不躡昏迷之途使臣
深結道緣遙申齋願望三清於通路資一漑於良田
此時枕越石之戈暫妨高卧他日把浮邱之袂豈訝
後來臣某無任慙懇投辭虔禱惶切之至謹辭

又

年月日啟請如科儀臣伏以測管窺天雖乖曠望揮
戈駐日蓋感精誠苟爲山之力不虧則至海之期何

遠仰玄門之善閉遵妙道以勤行但以爲子爲臣曰
忠曰孝旣增榮於國祿願無忝於家勳手握玉符且
救寰中之難志棲金籙唯思象外之遊每慮政失務
三法虧畫一雖慎撫綏於南兗尙多憊咎於北鄴況
當剪寇爲期弭兵未暇今則月就盈數日臨下元遙
倣真儀敬陳齋法儼星壇而稽首想風馭以馳魂伏
乞太上三尊十方眾聖玄慈見蔭良願克諧翠華早
耀於秦雲皇祚永興於漢日百官多慶八裔同歡寇
戎則銷燧象之災幽滯則假燭龍之照然後使臣世
官貞吉道業滋成遺榮待泛於五湖企想潛通於三

島作人間之都尉蒯訓無心拜天上之侍郎沈羲有
望唯願在家必達終能直道而行臣無任祈恩懺罪
虔切惶恐之至謹辭

上元齋詞

年月日啟請如科儀臣仰察玄經乃見道資眾甫俯
稽聖典則知神應至誠是以早詳病病之言每勵賢
賢之行五音五色實除耳目之娛六甲六丁潛致爪
牙之役願躡輕飛之路常敲眾妙之門但屬戎馬生
郊陳蛇奔穴無苟免而臨難不得已而用兵蓋報主
恩慮虧臣節只誓顯誅寇孽寧知暗積憊殃雖軍律

克申而真科是懼今日日延和景月滿初元遇吸新
吐故之辰懺喙腐吞腥之罪儼陳醮禮敬薦齋誠燈
耀九光燼焚百和寂寥塵外幡幢靜設於星壇髣髴
雲中環珮似傳乎風馭冀銷妖祲仰告威靈伏乞大
降玄慈下從丹懇萬乘永資於萬壽百官皆荷於百
祥戰場則荆棘叢生農壤則麥禾花茂凡云蠢動盡
獲昭蘇然後俾臣援溺功成奉身以退沖靈道遂鼓
腹而遊飽瓊藥之糗糧就瑤臺之蹊徑遇圯上者終
諸素志自有前蹤入壺中者益感專心寧無後望既
殊捕影敢憚勞形臣無任悔過祈恩虔切惶恐之至

謹辭

中元齋詞

啟請如科儀域中之四大難名字之曰道物外之三
清在想心以爲齋豈圖滋福於一身唯願洽恩於萬
彙臣生逢聖日志慕真風寧貪久視之門有覬輕飛
之路但以行先不殆德貴有餘每虔一氣以存思非
止三元而展敬今則雲摧火影風憂金聲當中元積
慶之辰謹修常醮以下界罹災之事仰告玄慈一昨
夏景旣闌秋成甚邇而乃曠野則飛羊斂翅深泉則
黑蜃藏鱗噉噉之黔庶何依烈烈之蒼穹莫訴雖近

卷四十一
七
沾美澤而尙慊農郊伏乞太上三尊十方眾聖下從
精懇大庇生靈使風雨常調煙塵永息興聖祚於千
秋萬歲振歡聲於四海九州然後俾臣功名則與國
同休道業則在家必達水中泛泛謝時態之澆浮雲
外飄飄逐仙蹤而騫翥旣探珠而有望寧種玉以無
因臣不任祈恩救災懇禱虔惕之至謹辭

齋詞

啟請如科儀伏以混成至道本在勤行眾妙玄門唯
資善問故曰修之身則其德乃貴修之國則其德有
餘旣能事小功多可謂暫勞永逸臣雖手提金鉞而

心寄瑤臺飄飄然自有良期擾擾者誰知積學是以
三元致敬一氣存思仁天上之雞聲潛懸素望待海
中之鶴信每瀝丹誠終冀用之則行豈言深不可識
今者謹齋薄禮仰贖玄慈所願轉茂靈根漸拋俗界
餌崦嵫之奇草飲沆瀣之仙漿漢代淮王終遂仙遊
之樂周時柱史何妨吏隱之名苟保天成奚言日損
景仰於其中有象原知於此外無求臣無任投辭懇
迫虔禱兢越之至謹辭

黃籙齋詞

啟請如科儀臣身拘俗網志仰真筌雖窈窕冥冥至

道則無形可扣而勤勤懇懇精心則有感必通是以
每勵焚修敢安晷刻所冀學海而終歸巨海好龍而
不懼真龍豈貪輕舉之名但效勤行之旨然以早分
相印久握兵符當扶危靜亂之秋有戮暴誅奸之役
伏慮政條失所刑律乖宜愆違暗積於玄司殃咎難
逃於黑籍今則景銷木德節啟火威稽首昊天叩心
三尊十方眾聖俯矜丹慊深降洪慈使電滅于災雲
興百福永資玄蔭漸茂靈根埽閭外之煙塵早成勳
業玩壺中之日月免役夢思臣無任悔過祈恩懇迫

惶恐之至謹辭

禳火齋詞

年月日啟請如科儀於紫極宮內修建洞淵妙齋三
日四夜轉經行道爲禳當府火災祈恩投辭上詣虛
無元始天尊伏以波蕩四溟塵昏九野遂見綿區而
宇未能滅禳消氛臣雖志悅道風而身沾睿澤早託
山河之誓久臨淮海之封每慎撫綏不遑寧息麤安
一境已涉五年齋誠仰貢於上玄妖氣願銷於下界
豈料天心悔禍必俟時期地分罹殃難逃歷數方當
暮月始起融風遽興鄭國之災難施瓘將救成都

之急誰嘆酒杯所煥既多俱焚是慮眾力猶勤於撤
屋羣心免駭於燎原今則每念傷人唯知罪己仰投
靈宇敬醮寶壇祓禳異於四郊寧拘古禮祈禱遠
瞻於三島但獻精誠伏乞太上三尊十方眾聖曲流
玄澤大挫陽精使回祿知非祝融請罪閭閻撲地皆
除火宅之災道路生風永作水鄉之福烝黎樂業師
旅懷安搆陰謀者自就消亡歸善化者各資榮泰齊
登壽域仰望仙鄉臣無任歸罪乞恩虔禱懇迫惶恐
之至謹辭

天王院齋詞

唐中和二年太歲壬寅正月望日具銜某敬請僧某
乙設齋于法雲寺天王院謹白言舍利佛大慈大悲
觀音菩薩伏以欲界將傾魔軍競起九野塵昏於劫
燼四溟波蕩於狂飈諸侯志慕於宋公星無三徒聖
主德齊於漢帝日未再中不知天養鴟梟地容螟蠚
力闕之羣兇得便義征之眾旅摧威某也手握兵符
心抱將略欲展焚枯之力願成拯溺之功是以景仰
三歸勤行十善深憑護念敢啟邀迎宇內瘡痍略假
醫王之術世間疲瘵遍希慈父之恩今則幸遇初元
精修美供春露洒琉璃之境曉風吹薜蔔之香想其

舍衛城中長老盡攜弟子水精宮裏天王便作主人
伏願舍利佛大慈大悲觀世音菩薩教既東流跡能
西降遠救閻浮之地慙離兜率之天問疾語言不競
維摩之說稱名功德可逃羅刹之災唯願共泛慈航
齊揮智劍寢驚濤於苦海埽妖氣於昏衢則乃慧燈
照天帝之心法鼓破波臣之膽靜銷諸惡暫開方便
之門廣庇眾生無惜慈悲之室謹疏

爲故昭義僕射齋詞二首

中和二年七月二十三日爲故昭義姪孫僕射及二
孫子敬設齋于法雲寺聊憑法疏用寫悲詞以昭義

姪孫幼蘊壯圖長居重任不埽一室有志四方手運
豹韜旣是吾家之事身持龍節累沾聖代之恩至於
越海征蠻對河分陝立戰功於遐徼傳理化於近藩
慎守詔條能諧物議遂移上黨實委外權尋屬戎馬
生郊陣蛇出穴遽聆寇孽直犯京華頻興伐叛之師
消急訓戎之令上將則雖期徇難欲竭忠誠小人則
多是幸災潛興狡計叛徒忽至橫禍斯侵弘演納肝
其誰能繼鄴舒傷目所不忍言噫道則日彰志惟天
奪征旌永卷飛旒遠來言念彫零莫勝悲慟但以推
尋佛理抑割俗情旣知前世因緣羸解此時冤痛況

乃父立忠節子揚孝名古賢所稱今我何恨俾資冥
福敬設妙齋所願慧炬照迷慈航援溺早推誠於貫
日終致樂於生天子子孫孫永絕怨讎之本生生世
世常逢安泰之期謹疏

又

中和二年七月二十七日某官某乙奉太尉處分爲
故昭義僕射於法雲寺設三百僧齋并寫金光明經
五部法華經一部永充供養蓋聆佛修慧力普濟羣
迷人發信心終成善願苟得影從至教必能響答虔
誠伏以昭義僕射夙振雄圖繼分重寄將軍投袂練

兵而方切專征天子剪衣飛詔而唯憑妙略仁建設
中之勳業忽罹意外之災殃不弔昊天奪我良胤今
則敬投蓮宇虔設桑門仍口貝葉之真蹤仰奉法華
之妙義伏願乘茲功德解彼冤讎災星昔照於豫州
已推定分慧日今懸於覺路永絕良緣謹疏

祭五方文

年月日具銜某謹以清酌庶羞量幣之奠敢昭告于
五方神之靈傳不云乎五行之官是謂五官封爲上
公祀爲貴神社稷五祀是尊是奉木正曰句芒火正
曰祝融金正曰蓐收水正曰玄冥土正曰后土是以

禮云共公氏之霸九州也其子曰后土能平九州故祀以為社然則神主順天靈功莫測諸侯列土祀典宜行惟夫人實統陰祇廣含坤德身為萬物之母首冠五方之君職奉軒皇功標口社殷湯罷改遷之議漢武陳祠祭之誠是知神鑑則無偏無頗物情則以享以祀昔平九土既能疏決江河今處五方豈不庇安淮海靈其調和於金木水火驅役於風雨雪霜使春夏秋冬永息災殃之氣東西南北靜除氛祲之源牢幣具陳庶羞甚潔致敬不虧於中雷施恩幸滿於大藩唯候豐穰冀神報塞尚饗

築羊馬城祭土地文

年月日具銜某以兵戎未息禦備是勤乃命修築羊馬城遂遣某官某乙告於土地之神曰夫城郭之設邑居所憑陋之則狡者或口美之則寡能固守況今豺聲競發虺毒遍吹易動難安何處能為樂境暫勞永泰此時須建良功遂乃揣高卑議遠近便令百堵皆作終可三旬而成徵名於伏櫪觸楹接勢於長雲斷岸不假龜行之跡豈須龍見之期眾既叶心事無費力神其德惟博載道實流謙勿辭板築之喧勉致金湯之固使雲歛雷杵遠振歡聲鳥堞隼墉高標壯

觀北吞淮月南吸江煙平欺鐵寶之名迥壓金甌之
記有備無患神其聽之

祭楚州陣亡將士

爾等尺籍從軍寸心報國羔裘武節既以力稱馬革
雄圖早將身許爰有徐孽來侵楚封春喉之壯氣未
申失手之冤聲遽起始見荷戈就列翻爲復矢成行
然而功其可稱死且不朽有狼曠之君子無羊斟之
小人昔時之重義輕生不求苟活今日之名存身喪
豈貯遺悲魂其有知各歆薄酌

寒食祭陣亡將士

嗚呼生也有涯古今所歎名之不朽忠義爲先爾等
曠弩勞身蒙輪逞力奮氣於熊羆之列忘形於鵝鶴
之前能行勇於干戈固免慙於牀第今也野草綠色
林鷺好音杳杳逝川空流恨而無極纍纍荒塚誰驗
魂之有知我所念兮舊功勞我所傷兮好時節俾陳
薄酌用慰冥遊共謀抗敵於杜回無效懷歸於温序
能成壯志是謂陰功

移浙西陳司徒廟書

滔滔逝水幽顯雖殊凜凜雄風古今何讓苟或同心
立事必能異代論交司徒壯節奇功備載外孫之碣

靈恩顯驗高傳太伯之鄉譚揚而不假再三徵引而
難窮萬一今則冀動玄鑒直書素誠既當可舉而行
固在不言而信且此誓除國難濟命舟師將泛西江
卽離北岸練鋪一水指疆界以雖分黨列千山望威
靈而如在於敝境已立嚴祠敬迓來儀迺酬前願
幸移玉趾無戀石頭桂楫蘭橈早決遷居之計鸞絲
鳳管伴伸迎奉之儀況乃近境無虞芳筵不絕但得
禍淫福善何妨捨舊從新北渚煙花休起別離之恨
東塘風月好追歌舞之歡必能依統帥指揮永可振
司徒勳業特差專介用啟至誠昔之青骨標奇已謂

陰陽不測今也赤眉稔惡豈宜征戰無功將申烈烈
之威實假冥冥之助所冀八公山上遍設雄師五里
霧中能呈異術則必陰子春之破賊吳大帝之封王
其立功名若合符契無誤會稽之軍備有慙卽墨之
神謀早詳禴祭之言永副里仁之義某白

手札

風煙雖邇雲霧難披景仰靈威遙申誠願今已靜搜
勝地高創壽宮永可安居謹令咨迓便請挈家速至
專當埽席相迎且鐵甕城低金陵地狹能施百福無
滯一方此欲劔拂妖星旗迎聖日必期大捷永致中

興幸其來助陰兵其成王事目極東流之雪浪心馳
北顧之煙峰神兮移來哀江南某白

西川羅城圖記

西川羅城四仞高三尋闊周三十三里乃今淮海太
尉燕公所築也粵若梁州別壤蜀國雄都內跨鍵梓
外聯蠻蠻左臨百濮右挾六戎咽喉之控引實繁唇
齒之輔依難保自昔髓靈流異龜跡標奇藩籬始建
其一城扁鏑猶虧於四郭莠子則既忘重閉衛人則
唯慮徙居蠢彼狗封恣其狼戾每至草乾焚道浪縮
瀘河則必推紆橫侵撥羣驅隊編毗懾鼠巷哭街號

戎兵以拔旆為中權府尹以閉關為上策稔成氛禳
積有歲時洎乾符初偶絕羈縻大興叛換白虎之狂
災漸盛黃龍之舊約難尋兵力莫申帝心有寄以公
慶傳涓夢業練圮書交趾銘勳則永威八詔鄆城報
政則不待三年屬蠻寇加囂王師告老遂飛急詔請
救倒懸由是自東徂西以晝繼夜走單車於外境豈
煩龔遂獻書受戎輅於中途莫掩晉侯稱伯公鄆行
次咸陽
除授西節制遙銜睿略倏達成都于時驃信屯兵逼郊隊
而纜踰一舍黔黎失業焚里閭而何啻萬家彼則舉
國而濟師此則闔城而受弊外熾崑岡之焰嘆酒無

能內枯疏勒之源指梅何益莫非枕倚墻壁誰堪環
執甲兵公至止之日豁啟城扉若開籠檻威振而寧
勞利器邪膽皆摧化行而如嗅新香驚魂盡返蠻王
以鑿耳飽聆其異略鏤膚畏挂於嚴誅恟然觀電懼
雷歛爾烏飛魚散公尋令選銳暫使追逃乘其垂翅
之時展我燎毛之勢數俘莫記執馘居多爾後因閱
地圖得搜天險是猿狖養高之窟爲豺狼伺隙之蹊
乃令一坳雄關一標巨防修功峽關置平夷鎮危堞
則憑巒助峻長溝則導澗資深宛成善閉之機實扼
間行之徑丸泥可固斷知無得而踰燿火罷驚坐見

不爭而勝仍尋水道別建河營

大渡河側置防河營遠方猾夏

之徒難謀航葦均發戍申之卒免詠流薪疆陲永保
於覆孟屢開唯矜於列鼎卿雲邦彥閑吟搜吐鳳之
詞卓鄭鄉豪靜坐貯蹲鴟之利公以寢處戎闔夢想
扁舟將申遠慮於無窮豈立空言爲不朽乃曰彼蠻
之習也外癡內黠朝四暮三雖莊叔此時功已成於
長狄而季孫他日憂必在於顓臾詎可虛號錦城尙
無羅郭守民之制非我而誰敢抱而神欽至誠飛章
而帝允丹請時有賓寮進難將校獻疑皆云公孫述
躍馬雄臨非無意也諸葛亮卧龍崛起亦有志焉但

以曩築子城猶資客土九年方就百代所難蜀口無
土昔張
儀築子城輦土於學射山
日役往返九載後始成 況今將興廓落之基恐致
遷延之誚公曰術口先定事當速成必能終簡天心
豈謂虛穿地脉於是郡侯奔告邑尹樂從乃使揣高
卑議遠邇慮材用量事期探時候於魯書佚規模於
周令引長江而剗長塹夏禹慙能對高嶽而劃高墉
秦皇失色矧乃命五丁而嘯侶運六甲以驅僮大吳
則諺水於寒泉地媪則變沙為美土蜀地穿未盈尺
泉源漲起至是
土出沙中實謂百靈幽贊萬姓悅隨鋪聚雲鋒杵騰
雷響不見烈風凌雨又令簋飽觴酣登登而只競歡

呼屹屹而便如湧出百堵皆作三旬而成然後郢匠
勞功素材變質優人展妙積壤凝華攢空而烽櫓高
排架險而闔閭聳起橫分八尺結雕甍而彩鳳聯飛
檻徹四隅擁繡堞而晴虹直挂罩一川之佳景籠萬
戶之歡聲遠而望焉則巍巍峩峩若雲中之疊嶂錦
霞縠霧隱映乎其上迫而察也則赫赫燁燁想海畔
之仙山金臺銀闕焜燿乎其間始自庀徒終於解役
不假朽緡於官稅無資剖粒於軍租築板所費錢一
百五十六貫米
一十九萬石皆由
智計不破上供 皆聚羨財儼成壯觀遂使蠻酋禡
魄賓旅歸心不敢言摩壘而旋無因致入郢之役爰

徵繪事仰貢九重旋降綸言過褒一字宣睿旨於翰
林才子綴妍辭於黃絹外孫築城碑今租庸王相公承旨撰詞公雖
迎金鳳銜書未議石龜戴版蓋乃謙冲自牧恥其功
伐驟稱及蒼鳥高飛翠華遠狩儼仙遊於玉壘安聖
慮於金墉故得親覽宏規益欽忠節特傳瑤檢徵進
碑詞遂命雕鐫永揚威烈實萬古未聆之事乃四方
無比之榮美矣哉龍以雲興魚因水樂誰不仰公智
周物表事照機先凡施權謀若合符契則昔全蜀未
城也天留盛績日待英才所謂有非常之人然後有
非常之事有非常之事然後有非常之功是以非常

者固非常人之所覲也致遠雖丘堂覩奧師冕何知
而秦國斂賢由余不棄謹成實錄敢記殊庸所冀四
海梯航閎雄圖而稽顙九州旄鉞望法駕而安心中
和三年龍集癸卯八月二十五日記

補安南錄異圖記

交趾四封圖經詳矣然而管多生獠境邇諸蕃略採
俚譚用標方誌安南之爲府也巡屬一十二郡峰驪演愛
陸長郡諒武定武安蘇茂虞林羈縻五十八州府城東至南溟四百
餘里有山橫亘千里而遙邃穴深巖爲獠窟宅蠻蜚
之眾六種星居鄰諸蕃二十一區管生獠二十一輩

水之西南則通閩婆大食之國陸之西北則接女國
烏蠻之路曾無亭墩莫審塗程跋履者計日指期沈
浮者占風定信二十一國雞犬傳聲服食所宜大較
相類管內生獠多號山蹄或被髮鏤身或穿胸鑿齒
詭音嘲嗜姦態睚眦其中尤異者卧使頭飛飲於鼻
受豹皮裹體龜殼蔽形擣木絮而為裘獠子多衣木
皮熟擣有如織編竹苦而作翅生養則夫妻代患長成則父子爭
雄縱時有傳譯可通亦俗無桑蠶之業唯織雜彩挾
布多披短襟交衫或有不縫而衣不粒而食死喪無
服嫁娶不媒戰有排刀病無藥餌固恃險阻各稱酋

豪遠自漢朝迄於隋季荐興邊患頗役遐征馬將軍
標柱歸時寸分地界史總管倒碑過後略靜海隅洎
咸通初驃信挺災元戎喪律鳴嘯於跼鳶之地豕豕
於束馬之塗摧兇欲快於椿喉拯溺唯思於援手先
帝以今淮海太尉燕公宣威大漠政治上都時公防
禦秦城剗平醜虜才歸乃請出鎮龍編立身豹略剗彫題而
輦下出鎮安南卵碎活黔首以肌豐復壁壘於一麾拔封疆於萬里
有蠹皆削無冤不伸朱道古稔姦於外杜存凌恣虐
於內皆為安南巨患公乃誅滅無遺故褚令公遂良竄歿日
南子孫雕零公特表洗雪然後使電母雷公鑿外
域朝天之路山靈水若偃大洋沃日之波安南經峇
口天威神

功所開播 遂得絕蠻謀之北窺紆漢軍之南戍乃鳳
傳徵詔鷁泛歸程至於洞獠海蠻莫不醉恩飽義遠
投聖闕請建生祠則知善政所行殊方可誘既見馬
如羊而不取縱令蟻若象而何虞足以驗四夷之時
或不賓九牧之任不得所也有柔遠軍從事吳降嘗
集是圖名曰錄異敘云久觀遐蕃目擊殊形手題本
事然則信以傳信斯焉取斯口閱前詞退而歎曰愚
之所以爲異者其諸異乎人之所異曰六合之內何
物則棄至如鼠肉萬觔蝦鬚一丈旣知南北所產永
釋古今之疑則彼獸性羣分鳥聲類聚誠不足異也

頃太尉燕公受三顧恩用六奇計使獷悍歸服邊陲
晏然今聖上省方蒙王獻款不敢弄吠堯之口永能
除猾夏之心皆由燕公收交州鎮蜀郡威振於奔魍
走魅功成於金壘湯池所謂蘊先見之能察未來之
事呼吸而陰陽不測指蹤而神鬼交馳實爲天工人
其代之斯實可爲異矣聊補所闕敢貽將來時翠華
幸蜀之三載也

求化修大雲寺疏

大雲寺募緣求化重修建瓦木工價等詳夫教列爲
三佛居其一其如妙旨則暗裨玄化微言則廣諭凡

流開張勸善之門解摘執迷之網然則欲使眾心歸
敬須令像設莊嚴有感必通無求不應墾情田而種
福游法海而洵殃不可思議於是乎在當州城西大
雲寺雖臨楚甸實壓蜀岡舊創仁祠高標兌位兩洗
煙牕之色萬朶前山風敲月砌之聲千株古木在一
郡乃徧爲勝境於四時則最稱芳辰至如春水綠波
雜花生樹都人士女以遨以遊不勞聽法之緣自得
消憂之所則與城東禪智寺震肩對聳兩耳齊張夾
湯帝之遺宮攤淮王之仙宅壯茲樂土倚彼福田前
年偶值飛蝗未能避境旋憂聚蟻或欲毀堤故護軍

特進以將隔妖氛忽興猛焰遂使瑠璃之界翻成煨
燼之餘雖菩薩焚身固爲常事而苾芻住足盡失安
居可惜祇園便同隙地今幸遇太尉將驅眾旅仁滅
羣兇旣逃過去之災或補未來之福欲安盛府許葺
精廬欲使爐續朝香鐘迎夜梵樹宿獼猴之友林棲
鸚鵡之王蓋尋貞觀之中曾傳帝語豈效太清之末
酷信伽譚所願廣運慈航徐搥法鼓深資功德靜剗
妖魔百官榮從於鸞旌萬乘遄歸於象闕次願太尉
廓清寰宇高坐廟堂演伽葉之真宗龍堪比德舉儒
童之善教麟不失時克興上古之風永致大同之化

凡於戴髮含齒鱗潛羽翔皆荷慈悲盡能解脫但以
一毛可拔先求信義之心百足不僵須賴扶持之力
既難獨辦固託眾緣無吝羨財合資洪福富者不仁
之說自古所譏積而能散之規於今可誠謹疏

求化修諸道觀疏

紫極宮重修城下諸宮觀求化瓦木等價伏以苦縣
誕靈神州演法真性乃聖朝之祖強名爲至道之宗
玉葉金柯耀芳陰於萬代瑤函瓊笈傳妙旨於四方
遂得齋醮有歸科儀無墜神宮靈宇宛寫諸天祕殿
精壇嚴修勝地當州東吳麗俗南克雄藩鮑參軍則

賦銜精妍揚執戟則箴誇天矯而乃至道少勤行者
玄門無善閉之味澹口中動成大笑義深目外誰信
上昇福庭則草沒塵侵仙室則雨傾風壞况值臯聲
競噪虺毒強吹到處星飛但見羽書之急經年霧集
唯聆甲騎之勞俗既喧驚教增寂默未有葺修之暇
非無捨施之緣今幸遇太尉德繼猶龍道深有象黃
石公之妙訣雅稱帝師赤松子之勝遊仁迎仙友是
故出則以六奇制敵入則以九轉服勤靜除闔外之
烟塵閑對壺中之日月三元遵敬一氣精修果見眞
位高遷殊祥荐降彩雲片片飛來楚岫之風立鶴震

震喚向隋宮之月又乃前年則江寇南逼去歲則淮
戎北侵蟻皆恃於成羣虵欲矜於結陣伏賴太尉雄
威坐振眾孽奔亡四鄰戴信於桓公入郡感恩於邵
父覩耕農之蔽野聽歌吹之沸天古人有言爲可爲
於可爲之時則可其城下宮觀今欲旋集良工增修
舊址擬金室銀堂之制處處騰光俾星冠月帔之徒
人人潔跡微功若就良願克伸龍圖早耀於中興虎
旅永摧其大盜次願太尉運籌佐漢迥掩張良拊棹
遊湖靜追范蠡石留馬跡臺挂鳳音蓬島花開春醉
而閑乘白鹿芝田雨過曉耕而長任青牛罷吟小桂

之篇獨邁大椿之壽然後仰從翔翼俯至潛鱗凡曰
含虛悉能蒙福但以所修宮觀荒摧旣久經費甚多
無因獨辦資糧唯仰眾成功德迦譚之難捨能捨猶
見樂輸道教之自然而然幸無輕諾謹疏

卷四十一
一
傾螺難將篆刻之詞輒頌陶鎔之業但以間生賢哲
年當五百之期廣集英豪客滿三千之數既納之似
水則來者如雲斯乃司徒相公鏡於心而寬兮綽兮
枵於事而無偏無黨網羅彥彥籠罩驍雄於儒則沈
謝呈才於武則關張效力遂使弓旌招隱士巖谷爲
之一空介冑降叛夫煙塵爲之四息豈獨分憂於閩
外實惟稱慶於寰中莫不信齊於春夏秋冬恩播於
東西南北但日月照臨之所是風雷變化之時然則
尼父堂中亦有他鄉之子孟嘗門下寧無遠地之人
片善可稱前賢不讓永能執大邦之政豈欲遺小國

之賓是以敢寫微衷輕投朗鑒某新羅人也身也賤
性也愚才不雄學不贍雖形骸則鄙年齒未衰自十
二則別雞林至二十得遷鷺谷方接青襟之侶旋從
黃綬之官既忝登龍敢言絆驥今者乍離一尉欲應
三篇更願進修且謀退縮獨依林藪再閱丘墳課日
攻詩虞訥之詆訶無避積年著賦陸機之晒咲何慙
俟其敦閱致功琢磨成器求魚道在垂竿而不挂曲
鈎射鵠心專撚筈而冀銜後鏃端操勁節伫望良時
竊見萬物投誠八紘嚮德不謁相公賓閣不遊相公
德門者詞人之所懷慙羣議之所發誚某固敢隳肝

卷四十一
二
瀝膽進牘抽毫不避嚴誅輒申素懇謹錄所業雜篇章五軸兼陳情七言長句詩一百篇齋沐上獻冒犯尊威不任戰懼之至謹啟

再獻啟

某啟某今月五日謹以所學篇章五通貢於賓次雖慙獻豕輒覬攀龍脩客路以心摧望仁風以目斷乍覩秦雲之態或似美人細看燕石之姿恐爲棄物伏蒙司徒相公光逾愛日煦及寒灰念以遠別海隅久沉江徼特垂豐餼俾濟朝饑自驚榜櫟之材已荷程梁之惠雖龜魚投水驟喜命蘇而蚤蝨負山深憂力

敗且某也兔絲雖絡蛛網自營萬計尋思不如學也百年勤苦猶恐失之所以未競宦塗但遵儒道筮仕而懶趨塵土卜居而貪意林泉人間之要路通津眼無開處物外之青山綠水夢有歸時所願更淬鋏刀終求鐵印斂跡而跼藏學藪安身而跌宕詞林嘗誦古詩還符此意云志士惜日短愁人知夜長某旣懷志士之勤又抱愁人之苦聊憑毫牘敢述肺肝且如蹋壁冥搜杜門寂坐席冷而牕風擺雪筆乾而硯水成冰欲爲尼父之絕編無奈羲和之促轡卽可知指萬卷之經史恨三冬之景光及其凍枕傷神孤燈伴

影寒漏則滴殘別淚遙砧則搗破羈心空勞甯戚之
悲歌莫繼陸機之安寢亦可想貯千端之鬱邑過五
夜之寂寥然則志士之勤也既如彼愁人之苦也又
如此況某家遙日域路隔天池投客舍而方甚死讎
指何門而欲安生計唯慮道之將廢豈言人不易知
不敢以陋質凡姿覲相公清嚴之德不敢以片言隻
字希相公採錄之恩所望者或以其萬里地遠來十
餘年苦學稍垂惻憫得濟困窮則必堅背水之心終
爲勇士決移山之志不讓愚公伏以某譯殊方之語
言學聖代之章句舞態則難爲短袖辯詞則未比長

裾舌無三寸之能空緘壯氣腸有九回之懇但戀深
恩千浼尊嚴下情無任感戴兢惶涕泗之至謹啓

謝生料狀

某啓某昨日伏蒙仁慈再賜生料恩垂望外喜集愁
中安貧而已瞻晨炊感德而惟知宿飽遂使范家釜
甌免恨長閑顏巷簞瓢倍加其樂伏以某雖楊曾穿
葉而蓬且斷根空把利錐冀遇大賢之鑑豈將長缺
先興下客之歌一昨輒貢蕪音累塵尊聽窺德宇而
燕雖相賀望威風而鷁恐退飛豈料司空相公俯念
海人久爲塵吏特垂記錄繼賜沾濡生前之溝壑無

虞饑寒雖濟頭上之邱山漸重負戴難勝依投而既
類窮猿展效而願同病雀下情無任云云

獻詩啓

某啓某竊覽同年顧雲校書獻相公長啓一首短歌
十篇學派則鯨噴海濤詞鋒則劍倚雲漢備爲贊頌
永可流傳如某者跡自外方藝唯下品雖儒宮慕善
每嘗窺顏冉之牆而筆陣爭雄未得摩曹劉之壘但
以幸遊樂國獲覩仁風久貯懇誠冀伸歌詠輒獻紀
德絕句詩三十首謹封如別定王拙舞適足自嫌嫫
母濃粧轉爲人笑不足贊揚休烈翻憂浼躄尊威然

聖人以激勸誠深不間互鄉童子學者以揣摩志切
皆投鬼谷先生伏惟特恕荒蕪俯垂采覽所冀趨仁
化於江北終得傳美譚於海東唐突藻鑿下情無任
戰慄之至謹啓

謝職狀

右某今月二十五日伏奉公牒特賜署充館驛巡官
者恩降台階光生旅舍承命而吟魂乍懾叨榮而病
骨能蘇攀依有心荷戴無力伏以某樗生曠野莠託
荒田豈惟良匠不窺抑亦農人見棄風歆弱植難舉
勢於凌雲塵織纖莖但懷愁於委地昨者不慚狷者

輒效狂生累貢巴詞仰瀆秦鑿伏惟司徒相公念以
來從異域遠寓樂郊俯愛似龍不嫌非鳳拔衰英於
糞上搜滯刃於獄中許廁嘉賓仍沾厚俸神仙見顧
稍親郭隗之臺驚蹇何施得主鄭莊之驛況乃念子
襟之志業辱華袞之褒詞刻畫恩深已能長價琢磨
志切終願成功修身則飲水懷冰鍊思則吟烟嘯露
唯當勵節以謂報恩謹詣衙門祇候陳謝下情無任
感激彷徨榮懼之至謹狀

謝借宅狀

右某昨日客司奉傳處分借賜官宅安下者仰聆尊

旨俯省庸才既榮投跡之有門唯恨殺身之無路伏
以自趨龍旆免泣牛衣職奉非輕書糧頗贍嘗讀魯
論語曰學而優則仕仕而優則學是以望東開之閣
永誓依仁坐北面之臆惟期肄業非敢隱居而不嫁
祇將直道而自媒今者幸寓樂郊况棲靜室登屨則
不勞涉遠簞瓢則永遂安貧豈謂愛閑誠堪養勇三
年就學非口慕藺之心一日成功願滿依劉之志下
情無任感恩激切兢惕之至謹詣衙門祇候陳謝謹
狀

出師後告辭狀

右某伏念來從異域託在德門昔曾名列桂科未知
稱意今忝職居蓮府始覺榮身恩既厚於稻梁跡能
安於萍梗日增學植月瞻書糧豈期市駿之金榜沾
駑蹇惟愧封侯之印未效禎祥今者屬以大憝通誅
中朝多難頃煩豹略伫滅豺聲伏惟太尉相公身耀
福星均臨庶類手傾霖雨遍洗妖氛遠命舟師重興
國祚華夷則望風競扑蠢植則剋日當蘇若某者空
有肺腸方重禱祝恨無羽翼一遂奮飛望龍節以魂
銷窺虎威而股慄雖則熊羆之力共喜安人其如犬
馬之心常增戀主下情無任攀依激切涕泣之至謹

狀

謝令從軍狀

右某適見客司奉傳處分令借舟船隨從行李者深
恩既降壯氣潛伸勵心而願效驅馳感德而難勝踊
躍伏以某塵中走吏海外腐儒五能非自濟之資一
割無可施之處惟增慷慨已分沉淪豈無投筆之心
時應未偶空有請纓之志力且難成誰謂忽被殊私
不遺賤跡許隨旌旆借賜舟航蹇足無堪敢望維駒
之念麼姿何幸遠叨泛鷁之榮況當泣路之時永荷
濟川之賜下情無任感戴欣躍兢惕之至謹狀

謝借舫子狀

客司奉傳處分借賜舫子安下者某方脫窮鱗得攀
畫鷁自慙跡在塵吏忽訝身爲水仙則彼甘寧割錦
纜而呈奢顧愷毀布帆而無恙豈若榮棲德宇又泛
仙舟風波無失所之憂烟月有搜吟之暇况清流滿
望暑氣銷威每當定志安神則乃銘肌刻骨謹課七
言長句詩一首齋沐上獻于瀆台階下情無任荷戴
兢惕之至謹狀

謝許奏薦狀

右某昨日見衙前兵馬使曠師禮奉傳處分特賜慰

問兼許奏薦令自修狀本來者俯慙蓬跡仰聽蘭言
喜抃而身輕欲飛兢惶而心戰難遏何者某職叨鄭
驛已謂極榮名達堯階實爲過望憑何展效佩此恩
光况乃朗鑑冰開英才霧集所宜倒屣則先迎王粲
築臺則次接劇辛如某者輟耕海上之田來泣塵中
之路雖云游學尙未成功豈料勤勞莫副於指蹤將
念已全於卵翼許令伐善將使警愚每思郗子之驟
稱深慙速謗欲效黃公之多讓又恐失時冀緝拙詞
仰遵嚴命南宮适之問宣父實有所歸東方朔之對
漢皇甯辭自責既忝風雷之變化伫期雨露之沾濡

下情無任感戴榮抃兢灼之至謹奉狀陳謝謹狀

賀破淮口賊狀

右某昨日竊聆淮口鎮狀報今月八日諸軍合勢殺戮狂賊已盡者伏以徐州賊黨偶因嘯聚敢恣喧張鴟梟同巢勢必不久蟻蝨相吊生能幾何猶懷拒轍之心未有返轅之意伏賴太尉相公雄聲遠振妙畧潛施謀安四方決勝千里遂使淮山樂境長成虎豹之威泗水孤城免作鯨鯢之餌功著於暫勞永息計資於彼竭我盈小盜旋除中興可望三軍之勇氣方振百姓之驚魂再蘇但仰恩威咸增抃躍謹祇候陳

賀謹狀

賀高司馬除官狀

某啓伏承司馬二十五郎榮膺寵命伏惟感慰伏以漢朝美仕稱太傅少傅之榮晉代高流誇大阮小阮之譽然而但欲脫身於利祿無非縱志於歌吟於臣則虧報主之誠爲子則失榮親之節豈期太尉相公重言天應美命風行遂令司馬二十五郎挂綵衣披朱紱動高堂之喜色振德宇之嘉聲佐理多閑藹餘芳於玉樹連官獨貴掩前哲於竹林某每愧小儒忝棲大厦覩鸚鵡之逸勢貯燕雀之歡心下情無任抃

躍之至謹奉啟陳賀謹啟

謝職狀

右某志雖求已藝不及人伏蒙太尉相公仁慈肉被
摧骸翼成鰥卵難飾片言隻字粗伸感德懷恩今則
久貯血誠敢憑毫素先甘鼎鑊仰贖旌幢謹具長書
咨陳下情無任戰灼之至伏惟特寬罪誅俯賜念察
謹狀

長啟

某啟某伏以短綆不可以汲深頑鋒不可以剗滯是
故不能者止周任有言自宜量力而行豈可從心所

欲某東海一布衣也頃者萬里辭家十年觀國本望
止於勝尾科第江淮一縣令耳前年冬罷離未尉望
應宏詞計決居山暫爲隱退學期至海更自琢磨俱
緣祿俸無餘書糧不濟輒攜勃筭來掃膺門豈料太
尉相公迥垂獎憐便署職秩跡趨鄭驛身寓陶牕免
憂東郭之貧但養北宮之勇去年中夏伏遇出師忽
賜招呼猥加驅策許隨龍旆久倚鷁舟每恨布鼓音
凡鉛刀器鈍縱傾肝膽莫副指蹤遽蒙念以慕善依
仁特賜奏薦重言天應忝獲超昇若非九重倚賴於
功名十道遵承於法令則其恩命亦豈肯許某自江

外一上縣尉便授內殿憲秩又兼章紱且見聖朝簪
裾烜赫子弟出身入仕二三十年猶挂藍袍未趨蓮
幕者多矣況如某異域之士乎昔有一日九遷無以
及斯榮盛某嘗讀魯論見仲尼使漆雕開仕對曰仕
進之道未能究習善其深志夫子致悅某雖慙不敏
竊有慕焉昨蒙恩慈特賜轉職尋已具狀陳讓兼納
所賜公牒伏奉批誨卽有勅命但請收之某旣蒙未
允至誠固且仰遵嚴旨立愧形影坐驚神魂每當夜
對寒缸曉窺清鏡感激而頭橫涕雨憂惶而背浹汗
漿雖榮擺脫於風塵倍報污瀆於門館伏以太尉相

公雄名峻望碩德茂勳不惟雲覆九州抑亦風揚萬
國寓目傾耳仰爲指南儒武所歸一人而已是以諸
道景附馬首是瞻其如都統巡官須選人材稱職外
塞四方之望內資十乘之威若今某塵玷恩知尸素
□位但恐買戎狄之笑沽史傳之譏昔漢朝金日磾
常在武帝左右帝欲別加寵遇日磾辭曰臣外國人
且使匈奴輕漢某今日之請實在於茲諸廳郎官早
陳公議蓋以賤無妨貴欲令夷不亂華某伏自前年
得在門下更無知識惟謁諸廳幕中垂情幸而獲宥
竊聆太尉相公去年夏於東塘顧問某之時諸郎官

同力薦揚和之如響遂沾厚遇遽竊殊榮昨者繼陳
讜言不徇尊旨實乃惜太尉相公之名望存淮南藩
府之規儀事體不虧裨贊斯在冬末面奉處分欲使
別開院宇雖承恩諾轉切憂懷何者六韜曰人才大
小猶如斗也不可盛石滿則棄矣故孔子云孟公綽
爲趙魏老則優不可以爲滕薛大夫今者甘寘嚴誅
輒傾真懇乞解所職官謗可也伏惟太尉相公特賜
允從令得其所儻蒙未垂擯棄猶許依棲則望或別
補冗員或薄支虛給一枝數粒可養羽毛斗水尺波
得安髻鬣固非矯飾廉讓爲名實願揣量分涯免成

負累恩德春秋傳曰齊侯使敬仲爲卿辭曰羈旅之
臣免於罪戾施於負擔所獲多矣敢辱高位請以死
告使爲工正不失令名故事昭彰卑誠悃悞守道而
得無慳矣登門而免見刑之但願藥曰留恩終有凌
雲之望著簪挂念永無委地之愁干冒台威下情無
任懇迫憂兢之至謹啓

謝加料錢狀

右某今日某官奉傳處分每月加給料錢二十貫者
某厚沾職俸過贍書糧羝羊之角且不羸颺鼠之腹
能易滿惟憂福盛難報恩深豈料筆端乏白鳳之詞

卷四十二
三
日無可效囊底獲青鳧之術月有所增但懷臨谷之心恐敗負山之力惟願除供陋巷之食分濟遠鄉之親同感厚恩永傳遐谷或成浮費必速幽誅下情無任荷戴兢惶涕泣之至

謝衣段狀

某啓伏蒙恩慈賜及生衣段一十疋者伏以風雖解愠日可畏威始當蒸鬱之時忝受鮮華之賜敢效八公之侶欲銜六銖但隨百姓之歡同歌五袴况乃某幸趨台階榮託德門實資千載之遭逢每濟四時之服飾愍念而情踰父母稱揚而禮異賓僚今者輕縠

衫材細練構制俾趨儉幕許曳鄒裾雖恩耀遠人足呈妍於鮫室而名慙奇士甘致刺於鷓梁下情無任感戴之至

謝借示法雲寺天王記狀

某啓昨日伏蒙恩慈借示修法雲寺天王碑綵毫乍閱俗眼初醒惟慙鐵印之傭流忽覩銀鈎之妙迹旣成國寶豈許家藏竊聆將勒貞碑始揮神筆風停滅暑天酒呈祥固知垂露之蹤便成甘露况假崩雲之勢永耀法雲宜乎琬琰之詞鎮彼瑠璃之地共傳嘉瑞遠振芳聲然則隋煬帝之故都永爲寶窟謝將軍

卷四十一
三
之舊宅終作福田下情無任捧讀祠禱榮懼之至其
碑謹專諮納謹狀

謝示延和閣記碑狀

某啓昨日觀察衙推邵宗奉傳處分賜及延和閣記
碑本一軸者跪展眞蹤仰窺臣節對銀鈎而手舞足
蹈望玉輦而魂飛騰揚伏以太尉力贍補天心勤捧
日遂啓遷都之議佗聆徙蹕之期恭候宸遊儼成壯
觀但以尋章摘句素非吳主之心進牘抽毫惟在陳
王之命爰令幕客謹撰碑詞支使侍御丘門顏回蠅
帳盧植能揮眞筆妙寫尊襟敘三年望幸之丹誠則

鼓傳衆聽述一片勤王之忠節則鏡照羣迷實乃酣
飲德馨備陳事實永使奇功秘畧皆令陋古榮今太
尉相公志切迎鑿喜勝覽檄旣贊美於凌雲百尺將
拖能於入木八分遂乃親染綵毫俾鑄翠琰隨手而
龍蛇旋活迎鋒而劒戟交橫畫玉點珠豈可比蘭亭
醉本撇雲挑霧只宜示蓬島眞仙誰料未儒亦叨殊
貺輒敢覬覩將顧是知誘諭孱庸何則名題桂宮跡
隸蓮府雖忝一時之有遇實無萬代之可稱今者支
使侍御以好善心得稽古力騁眞才子之藻思辱大
丞相之筆蹤推爲賓席殊榮別是儒家盛事則彼郭

隗受黃金厚禮虞卿沾白璧深恩強欲比方却成浼
瀆然則四方舐墨含筆之士也莫不競效顰眉之態
潛希唾口之恩仰脩脩然勤慥慥爾如某者學海至
海雖云有心執柯伐柯猶恐傷手持弊帚而徒增健
羨遇神雖而便欲投降惟願讀五千卷之書庶幾入
室把十九年之刃無愧發硎每覩仙書更敦壯志稍
希異闕黨童子何敢望儒林丈人其所賜碑惟慎捧
持敢矜披閱待過天池之外遍誇日域之中想彼驪
龍頷下之珠永當減價巨鼇頭上之客必欲偷看下
情無任寶玩師仰之至

謝改職狀

右某伏蒙仁恩特賜公牒改署館驛巡官令隨旋旆
西去者雖命重難荷而身輕欲飛稱心懷捧檄之榮
滿口詠從軍之樂惟慙幽劣有辱獎怜感恩而既識
海深舉步而但憂冰薄況無孫拳之精騎自比顏峻
之小兒將何以剖析事機游揚德業然所願者得睹
龍飛玉劍豹掣牙旗風雷振大捷之聲日月照中興
之運則某也有望於一言長價或爲天上之人萬里
從知免作池中之物行惟踴躍坐則禱祠下情無任
榮抃兢灼之至謹齋沐祇候陳謝

謝探請料錢狀

某啓某頃者西笑傾懷南音著操蓬飛萬里迷玉京
之要路通津桂折一名作金榜之懸疣附贅乃是常
常之事徒云遠遠而來海隅未覺於榮家江徼況勞
於佐邑由是詠南陔而引咎望東道以知歸伏蒙太
尉念掃德門許遷代舍濡毫染牘深慙雪苑之清才
頂豸腰魚遽忝霜臺之峻秩傳天上披衷之命榮日
邊垂白之親以宣父見知則實同陳隼以遠人多幸
則不讓漢貂雖乖就養無方久想宗族稱孝然而煙
波阻絕難申負米之心風雨淒涼空灑梁山之泣旣

疏溫清又闕旨甘但切責躬敢言養志況又無鄉使難
附家書惟吟陟岵之詩莫遇渡溟之信今有本國使
船過海某欲買茶藥寄附家信伏緣蹄泔易渴溝壑
難盈不避嚴誅更陳窮懇伏惟太尉念以依門館次
三千客別庭闈已十八年旣免行傭有希及哺特賜
探給三箇月料錢所冀祿遂及親遠分光於異域志
能求已永投跡於仙鄉干瀆台階下情伏增感泣兢
悸懇迫之至其請錢狀別具上呈云云

與恩門裴秀才求事啓

某伏念身托德門光生異域雖池蛟得雨無沉埋末

路之憂而海燕含泥有點污畫梁之罪跡賤而兢惶
倍切恩深而展效何期豈合更寫卑誠仰塵尊聽但
以事非獲已情或可哀不辭鈇鉞之誅冀滿斗筲之
望伏緣某昨聆座主侍郎主銓東洛道路不通且在
襄州行李極困早欲發遣專使切緣力未副心今有
諸兄弟裴瓌遠將窮懇相告輒具別狀干瀆台階下
情無任戰灼之至

前湖南觀察巡官裴瓌

右件人是某座主侍郎再從弟某去乾符二年冬到
湖南起居座主侍郎之時見於諸院弟兄中偏所記

念自數年繼遭剽劫生計蕩盡骨肉凋零久在江南
近投當府願披情懇泣告尊慈駐留多時不幸疾苦
遂且扶持發去云欲逕往襄陽迎接侍郎今得書云
行至滁州前去未得道途既阻溝壑是虞况孤孀三
十餘口更無產業未卜定居伏緣某家寄日邊路踰
天外杳無來信固絕他圖既無寸土以分耕甯有尺
波而假潤是以不量僭越輒具薦論命懸沸鼎之中
目斷台階之下非不知捋虎鬚之險非不知探龍領
之難但緣既忝門生豈論賓貢鴛鸞之與螻蟻感恩
皆同多士之與遠人報德何異伏乞太尉相公念以

程窮計盡憫其柱促聲哀特賜於廬壽管內場院或
堰埭中補署散職所冀月有俸入便獲安家裴瓌卽
自到襄州令弟瑋仰副驅策不度涯分浼瀆尊嚴下
情無任感泣兢懼之至

獻生日物狀

某啓伏以降跡仙山爲行恩於俗界挺神維嶽期定
亂於危時是以杞梓材長松椿壽永名字已標於金
籙兵符暫理於玉鈐伏惟太尉相公員嶠稟靈尼邱
誕質大任天降中庸日彰四夷識傾膽之門遠棲仁
蔭萬姓歸返魂之域盡飽德馨況今秦甸停氛鎬京

聚孽息虎旅奔沉之患望豹篇擒縱之機暫施決勝
之謀永致昇平之運則必坐寧環海後當去會瑤池
五色輕雲鎮隨行止千年素鶴競效驅馳獨保長生
却登眞位調鼎佐玉皇之命銜杯聽金母之歌自此
漢室公卿仰羨而空知望斷仙家朋友相逢而不訝
來遲某居近鼇峯遇深驥坂每睹張良之術惟吟郭
璞之詩喜對今辰敢陳善祝龜虵病骨叨承救活之
恩雞犬癡心竊有奮飛之望下情無任虔禱依攀欣
抃之至輒以海東藥物輕贖尊嚴謹具別幅伏惟俯
賜念察謹狀

又狀

某啓某聆天降賢人濟天下之人也是以材合地實
 性契天和高闕德門深匡帝室伏惟太尉相公漢師
 仙格魯聖儒機推心於三代之英鍊氣於五行之秀
 今者正融韶景其慶誕辰四方飽開閣之恩萬族獻
 稱觴之懇伏惟龍韜暫展靜卷妖氛鳳輦遄歸永興
 清運然後誠白石生之妙術從赤松子之勝遊鼇頭
 擎五色之雲久勞西望豹尾指二京之路暫事北征
 佯揚滅寇之勳便舉朝真之禮某棲身大廈祝壽中
 春下情無任禱祠歌詠欣躍之至謹具別狀輒申微

誠伏惟恩慈俯賜念察謹狀

物狀

海東人形參一軀一銀裝龕子盛

海東實心琴一張紫綾帟盛

右伏以慶資五福瑞降三清中春方盛於香風上德
 乃生於遲日凡荷獎延之賜合申獻賀之儀前件人
 參并琴等形稟天成韻含風雅具體而既非假貌全
 材而免有虛聲况皆採近仙峯攜來遠地儻許成功
 於藥日必願捐軀如能入用於蓬壺可知實腹誠慙
 菲薄冀續延長塵黷尊嚴倍增戰灼伏惟俯賜容納

下情幸甚

蓬萊山圖一面

右伏以重陽煦景仙界降真雖長生標金籙之名而眾懇祝玉書之壽前件圖千堆翠錦一朶青蓮雪濤蹙出於墨池鯨噴可駭雲嶠湧生於筆海鼇戴何輕不愧瑣微輒將陳獻望臥龍而股慄隨賀燕以魂飛伏惟畧鑒心誠俯賜容納所冀近台座而永安寰海展仙齋而便對家山許沾一顧之榮預報三清之信輕贖視聽下情無任禱祝歌謠兢灼之至

人參三斤

天麻一斤

右伏以昴宿垂芒尼丘降瑞始及中和之節爰當大慶之辰仰沐尊慈合申卑禮前件藥物採從日域來涉天池雖徵三楹五葉之名慙無異質而過萬水千山之險貴有餘香不揆輕微輒將陳獻所冀海人之藥或同野老之芹伏惟特恕嚴誅俯容情懇續靈壽則後天而老駐仙顏而與日長新下情無任禱祝欣躍兢惕之至謹狀

端午節送物狀

織成鞦韆一條

右伏以晏陰將定令節俄臨遇天地之仁時睹江淮

卷四十二
三
之樂境伏惟太尉應五百年之運用八千歲爲春仰
贊熏風高揚畏日不假渡瀘之役自成匡漢之謀某
忝在末寮合成微禮前件鞍幪駕機呈妙獸錦成華
當懋影於追風或資光於照地伏願鞍也助百福永
安之慶幪也表四方率服之誠干瀆尊嚴下情無任
禱祝兢惶懇激之至伏惟俯賜容納謹狀

雪扇一柄

右伏以星火揚輝雲峯聳影遇陳太守饗遙祠之節
效華封人祝仙壽之誠前件扇細糝飛綿輕鋪凍練
雖假丹青之迹實含潔白之姿裁規則不學齊紈空

誇圓月委質則願依孫閣得振仁風謹獻台階無任
悚慄伏惟俯賜容納百生榮幸謹狀

謝新茶狀

右某今日中軍使俞公楚奉傳處分送前件茶芽者
伏以蜀岡養秀隋苑騰芳始興採擷之功方就精華
之味所宜烹綠乳於金鼎泛香膏於玉甌若非靜捐
禪翁卽是閑邀羽客豈期仙貺猥及凡儒不假梅林
自能愈渴免求萱草始得忘憂下情無任感恩惶懼
激切之至謹奉狀陳謝謹狀

謝櫻桃狀

右中軍使俞公楚奉傳處分伏蒙賜及前件櫻桃者
伏以三春之下始閱羣芳百果之中獨誇先達綴仙
露而堪教鳳食被德風而肯許鸞含遂令摘自喬枝
分其美實豈期末品亦荷深恩捧持而色奪楚萍咽
嗚而味欺蘇橘何必貯赤瑛盤上最宜對白玉樽前
勻排萬顆之珠不惟眼飽似服一丸之藥便覺身輕
下情伏增感戴之至謹奉狀陳謝謹狀

謝冬至料狀

右伏蒙仁恩特賜前件節料者伏以某忝棲德宇不
愧異鄉萬里滄波雖恨絕東來之信三冬愛日且歡

迎南至之辰豈料尊慈別垂厚賜玉粒既資於同穎
霜華乃出於兩岐不勞大嚼之言却懷中聖之慮莫
識酬恩報德惟知飽食醉吟下情無任兢懼之至謹

狀

謝寒食節料狀

右伏蒙仁慈特賜前件節料米麪羊酒等者伏以口
人舉令回祿沮威正吟化俗之仁風又對順時之甘
雨仰沾豐餼遇瞻新炊况乃蟻慕芳羶蛆浮清醞捧
恩光而飽飫豈止三朝玩春色而醺酣可期千日祗
知歌詠何報陶鈞下情無任感戴之至謹奉狀陳謝

謹狀

謝社日酒肉狀
 右伏蒙恩慈特賜前件酒肉等者伏以候燕應期句
 龍受祀一半之韶光欲老干般之旅思相攻只知吟
 樂國之春豈料捧仙家之賜陵分甘隴淮減香醴想
 田夫醉舞之場起海客狂歌之興敢效陳平壯志便
 發大言惟尋徐邈前蹤畧判中聖其肉并酒謹跪領
 訖下情無任感戴之至謹狀

不辭無升效謝之至
 謹華謝正段狀
 不辭無升效謝之至
 紫綾
 紫天淨紗
 紫平紗

黃平紗
 黃綾
 黃絹
 熟綿綾袴段

右伏蒙仁恩特賜前件正段霞舒鳳縷雪疊鮫綃猥
 分絳帳之餘俾換褐袍之飾不學王尼巧說遽叨盧
 志殊榮惟慙螻蟻之姿不稱蜉蝣之什但願勵食藜
 飲冰之節報披朱拖紫之恩下情無任感戴兢惕涕
 泣之至謹奉狀陳謝謹狀

年雲水能怡夢蝶之心然而宸鑒屢回物情猶鬱欲
作山中宰相其如天下蒼生卽期大駕還京必赴上
台虛位斯乃萬乘瞻矚四方禱祈某海燕含泥忝棲
雲屋池蛟得雨早脫塵塗感恩自比於互鄉仰德但
思於闕里惟願泥沙賤質永資陶冶深恩卑情不任
攀戀虔祝涕泣之至謹狀

賀除吏部侍郎

某啟伏承榮膺寵命伏惟感慰張司空之一匡西晉
則藻鑒無倫謝太傅之忽起東山則烝黎是念苟欲
幽棲悅志獨處忘懷緘輝而恥耀秦臺蘊味而懶調

殷鼎則乃智者仁者止傳樂山水之名賢才俊才盡
失脫塵泥之望羣情久鬱美命遂行今者侍郎靜揖
巖扉高提銓管萬族仰清通之譽一時進寒素之徒
致使關中之寇孽災消海內之英雄道泰近又竊聆
風議仰順天心必謂文司再歸重德然則任賢得地
旣叶五百年之期好學趨門必盈七十子之數繼集
仙遊於蓬島盛傳儒禮於杏壇旣搜虹玉驪珠皆成
國寶仁見臺鸞閣鳳永作家禽某伏思萬里無依久
勞漂蕩十年有遇幸遂奮飛異鄉榮垂白之親達路
忝披朱之飾昔名士爲李公御者喜抃猶多今遠人

稱尼父生徒光輝無比陳至懇而喙輸三尺望深仁
而腸結九回下情無任抃賀踴躍感激之至伏惟俯
賜念察謹狀

賀除禮部尙書別紙

伏承天恩榮膺寵命伏惟感慰昔子貢曰夫子之文
章可得而聞夫子之言性與天道不可得而聞也然
則至於四科弟子窺測尙難況是萬里遠人鑽仰何
及固不效尤於篆刻請益於琢磨強搜類鶩之詞是
黷猶龍之德今者遠聆美命俯切歡心望峻中臺迥
冠鴛鷺之列恩深大厦空傾燕雀之誠伏惟捨念雲

泉拯民塗炭輔弼契千年之運奸雄避七日之誅某
跡忝諸生身拘倅職末由陳賀下情無任抃躍兢惶
禱祝之至伏惟俯賜念察謹狀

濟源別紙

不審近日尊體何似伏想孟津別壤沈水清源風晴
而欵枕泉聲雲曉而卷簾山色旣見境含秀麗固當
道脫冲和伏惟每慎寢興早歸燮理顯驗月中之夢
贊成天下之春卑情無任攀戀禱祝之至謹狀

迎楚州行李別紙二首

不審近日利涉長淮尊體寢膳何似伏以源滋桐柏

浪接蓬萊雖漸臨鬱悞之期而宛對清虛之境開樂
鏡而眞同月暎泛膺舟而況值風調誰言避地之行
實叶濟川之業伏惟緩飛仙棹靜運眞筌庶納休禎
每加遵護卑情懇望謹狀

又

某啟今月某日專使至伏蒙恩慈特降尊誨跪讀欣
抃不任下情伏審尙書遠赴天庭將遵水道整蘭橈
而思郭泰指桂苑而訪劉安睹神仙則楚俗皆驚聞
雅頌則魯儒相賀况某材實慙於楛矢跡嘗列於蓬
壺爲倚德門獲棲候府今者伫迎鶴駕卽觀龍章旣

知天幸遭逢惟切日深踴躍且曾哲陳浴沂之志只
見虛談仲由悅浮海之言終非實事輒以管窺筵擊
眞爲古陋今榮卑情無任攀戀欣抃兢惕之至云云

五月一日別紙

某啟伏以黃雀風高蒼龍星耀弄雨而梅雖應夏鋪
煙而麥已驚秋時定晏陰□資全德伏惟尙書處身
無躁深守禮經視履考祥雅符易道恬澹則老聃讓
美清虛則周顛懷慙水光長泛於玉壺豈須獨映天
意久留其金鼎惟望親調方當鷁泛仙舟必見鳳銜
睿筆入康帝室永福寰區下情無任虔禱鬱戀激切

之至謹狀

謝降顧狀

某啟某未遂山棲尚從塵役所居官舍深在軍營雖
異衡門實同陋巷既乏君章之蘭菊可襲馨香空餘
仲蔚之蓬蒿偏資寂寞春日則蝶牽晝夢秋風則蛩
助夜吟以此爲娛無他所覲今者方經離亂再獲起
居但喜攀父母之恩却慙下兒女之淚況某叨榮秦
爵就學漢儀姜維之膽氣雖麤鄧艾之口詞甚訥惟
深感激莫備啟陳伏蒙尚書念以遠方察其獨立俯
憐素志每煦溫顏聽及階及席之言佇銘骨銘肌之

懇早來又蒙降三清之仙駕顧一畝之窮居方慙隨
入室之賢豈料忝式廬之念非所敢望將何自安莫
不思光遠耀於殊鄉卑迹永超於末路揣庸賤則華
夷有隔較輝榮則古今無倫數年乖豹隱之期常低
俗眼此日觀鳳儀之後豁展愁眉下情無任感戴欣
抃兢惕之至謹祇候起居陳謝謹狀

與金部郎中別紙二首

不審近日尊體寢膳何似旣明且哲則詩美賢人視
履考祥則易稱君子旣樂持盈之道固安養素之機
況屬遲日載陽光風遍煦燕歌鸞舞深資酌桂之歡

智水仁山靜悅據梧之興伏惟永資景福早副急徵
擲立賞於煙霞濟蒼生於塗炭羣情禱望天下幸甚
謹狀

又

某啟某仰審格言側窺性行人能弘道賢臣以致堯
舜爲先世實須才俊士以效巢由是恥古者只傳於
方策今也共仰於德門伏惟郎中大雅含清中庸處
厚旣以高名肅物能將全德鎮時柱晴空而嶽頂無
雲瑩秋色而潭心有月比者蘭拋粉闥竹領朱轡出
分天子之憂來慰海人之望況彼郡也戶吞越水牕

列吳山得袁宏舉扇之風靈濤縮怒使謝運枉帆之
路釣渚含春及其五袴傳歌百錢流譽尋迎睿渥遙
陟華資懷寶令名誰發迷邦之間司珍正位仁成匡
國之謀而乃得之若驚直而不倨選勝於巖軒澗戶
貪歡於酒賦琴歌久聆萬乘虛懷忍見四方失望今
者梟聲向息鳳紀重興晉傅長才待示指南之制魏
牟積變仁申拱北之誠入覲冀堦坐調梅鼎豈止應
月中之夢必期成天下之春然則致堯舜之大猷永
匡宸展效巢由之小節不介尊襟某遠賣鮫綃慙非
重價仰趨馬帳忝預生徒下情無任攀戀禱祝兢惕

之至云云

與客將書

某腐芥無依斷蓬自役長走而未離塵土獨行而轉
困路歧昨者遠抱危誠專趨朗鑒竽聲恐濫琴調空
悲伏蒙將軍念以來自異鄉勤於儒道曲垂提挈得
遂獻投指喻情深師冕不爲瞽者獎知言重卞和免
作罪人荒淺何堪輝榮已極但以某無媒進取有志
退居以詩篇爲養性之資以書卷爲立身之本却緣
雖曾食祿未免憂貧趙囊則到處長空范甌則何時
暫熱況乃家遙四郡路隔十洲窮愁則終夜煎熬遠

信則經年阻絕時情冷澹俗態澆訛買笑金則易求
讀書糧則難致天高莫問日暮何歸始知學者之心
須託至公之力今幸遇相公山包海納雨潤風行有
片言可獎者稱譽出羣有小技可呈者隨材入用是
以無一物不歸美化無一夫不荷深恩然則舉中國
之人咸承煦育豈可令外方之士獨見棄遺某不揆
庸才敢投清德豈料將軍許垂拯拔每賜吹噓他人
之得喪榮枯皆推命分小子之昇沉進退只在恩私
儻或特假重言終榮賤質惟托針能入線則同錐得
處囊某已倚宦途粗諳吏道如能驅策未必跽藏終

當富見室家豈憚職榮州縣實以流年易邁壯氣難
申惟望庇庥得期變化所冀燕棲雲屋永無巢幕之
危鶴出塵籠稍識乘軒之使今欲專脩啟事再獻相
公少申感謝之懷預寫辭違之懇未知可否先取指
麾且某也姜維之膽氣雖麤鄧艾之口辭甚訥縱申
拜謁難具啟陳聊托牋毫代披肝膈未能患已先切
求仁將軍之心若鏡焉無幽不察小子之身猶箭也
惟命是從干浼旣頻慙惶益切伏惟終始俯賜念察
謹狀

謝宋絢侍御書

伏蒙殊造俯念移居借賜官車得離旅館簞笈則免
勞自負簞瓢則各識所安如承命駕之恩但勵抹輪
之志今者卜鄰甚靜學植可成惟屬袁粲之門不掃
陳蕃之室雖乘機立事輸他附勢之榮而守道安貧
贏得愛閑之樂旣諧素志但感深恩伏惟終始俯賜
念察謹狀

答裴拙庶子書

某遠離海島旅宦江皋比者暫願退居稍期肄業來
投樂國冀濟窮塗本望少瞻山資便諧谷隱伏蒙太
尉念以雀有多病鶴自遠來特署職名俾趨恩化等

緣狂花有失腐芥無依轉知山鹿野麋惟宜退縮永
謂鴻儔鵠侶不合攀瞻況乃器比斗筭之人身隨刀
筆之吏旅舍既拘於雉堞閑門可設其雀羅自前年
伏承庶子暫阻朝天偶來避地便欲托金牌之幸會
敘玉季之獎憐專候起居願搜誠懇蓋慮跡賤而動
多悔忝才微而易見棄捐強自微攀舊恩是爲玷逸
清德以此詮藏形影綿歷歲時雖知提筭有門惟恐
負荆無路豈料庶子恕以未陳禍刺先降劉賤閱溫
言而楚紕覆身捧華翰而隋珠耀掌兼蒙賢弟起居
未移曩顧遠賜榮緘不遺異域之人特辱同年之字

金膏珠粉旣垂摩拂之恩驥尾龍髯重有依攀之望
莫不駑駘長價瓠甌生光不惟誇衍於親朋實所輝
榮於遠俗謹當占筮撰日齋沐拜塵臙肝而盡瀝卑
誠擢髮而少逃厚責其他所奉尊旨謹具別狀啟陳
云云

謝高秘書示長歌書

伏蒙特飛榮誨寵示長歌玉海金山難測高深之本
北方南國徒觀美麗之姿贊詠無堦師資有路但如
青蓮居士惟誇散誕之詞白石山人只騁荒唐之作
但以風月琴樽爲勝概不以君臣禮樂爲宏規遂使

卷四十三
九
千年萬年所流傳皆嗟大雅小雅之淪弊今觀四十
三叔行出人表言成世資弄才子之筆端寫忠臣之
襟抱在今行古既爲儒室之宗憂國如家固是德門
之事天有耳而必當悔禍雲無心而亦可銷兵一言
自此興危邦六義於斯歸正道則所謂陳平宰社爾
曹何知鄧艾畫營其志不小永言他日足驗前程某
畏影雖迷偷光匪懈既知閱寶直若發蒙惟願將鵬
舉篇章傳於異域豈獨以伯魚對答誇向同聲下情
但增感戴欽仰降歎之至續專祗候陳謝

謝李瑄書

某啟某今月十日得祗候見太尉渤澥風息蓬萊路
通慙非席上之珍謬作壺中之客伏蒙溫顏見煦陋
質增榮鳳翼龍鱗終容攀附癡鷹鈍犬特許指呼勉
其檢慎之心諭以獎憐之意此皆副使不遺薄藝累
發重言始當獨臥北牕如蛙跳井豈料榮趨東閣似
鶴乘軒風雲既識於因依冰谷不遑於安處感深惟
泣誠止無言伏緣既忝從軍難爲乞假不獲祗候陳
謝

謝元郎中書

某啟伏蒙太尉恩慈特賜轉職不任歡慶某立兔微

儒焦螟瑣質早因慕善偶獲成名爾後客路多愁侯
門寡援麻衣始染於藍色竹簡尋摧其桂香伏自去
年刺謁燕臺職叨鄭驛皆蒙郎中推心獎念假力薦
揚使孤根無委地之虞短翮有凌雲之望今者忽忝
非常之遇深慙不稱之譏雖樂從軍敢安尸祿且鷄
披隼翼已覺非宜雞處鶴羣固當自責時日已具狀
辭讓以此未敢祗候陳謝伏蒙恩私特降榮誨奉讀
欣抃不任下情

謝周繁秀才以小山集見示

昨日早謁立成晚歸弊止覺戶庭之發光彩聞杙案

之散馨香遂因驚訊僕夫果得捧承留示溫辭一幅
粲然受益之規雅什九篇蔚矣患多之思莫不振紀
綱於六義飾冠冕於七言既崇大雅之基實播中和
之響伏以諸從事鴻儔鵠侶鳳翥鸞翔集桂苑之名
都占蓮池之雅望二十三官卽先輩備觀周樂深閱
楚材各陳贊詠之詞能展縱橫之作筆皆實錄機不
虛張始窺八首之前只謂衛多君子終覽九華之後
方知魯出聖人某今所以禱望者翠輦早遇東巡日
環免勞西獻二十三官百步穿葉一飛冲天姮娥則
迎入桂宮王母則引歸蓬島然後輟勝遊於御氣展

長策於濟時來登郭隗之臺坐弄陳琳之筆則乃今
朝麗藻已掩八仙公之名他日賓筵必盈七才子之
數見邱門之請禱待陳榻之解懸某便欲銜璧乞降
摠衣請益但以志勤詞戰雖將築室反耕道拙世塗
僅類杜門却掃未獲面申感謝謹專修狀啟陳云云

與壽州張常侍書

當今聖天子在上賢丞相在下然而宿德令望而推
者惟我上公暨滑臺中令兩地而已初常侍靜芟前
弊權握使符我上公以理狀聞請爲眞守帝惟曰俞
後常侍撫安郡俗振肅兵威大元帥以雄才薦請貳

前驅帝亦惟曰俞是得弄印分榮剖符行化踰月報
政盡活疲甿實謂壽之人永居壽域矣則乃常侍遇
賢丞相之知入聖天子之用乃武乃文多才多藝固
以播在四海某豈敢一二而談詠也今所禱願者碧
幢紅旆高引前途相幕將壇別張勝地謂予不信神
之聽之

賀楚州張義府尚書

國家自兵興已來爵賞旣多官榮甚峻然而常恐授
受之未能宜稱盡善盡美固當有待今則尚書以累
世勳望以數年戰功始假使符旋迎眞命某將趨清

德獲聽好音欣抃之來雀躍而已則非獨喜尚書展
龔黃之美政實乃賀聖天子之得良二千石也伏惟
云云

與假牧書

伏以近日辱尚書題言矜贊祝苟非全德多是愧辭
某執性近愚處身斯直以目所覩以耳所聆方敢詠
歌固無諂笑某自達仁境如歸故鄉見百姓之安則
知三軍之樂也見鄉閭之泰則知郡邑之肅也若非
常侍寬猛相濟恩威并行則何以至村落之居室家
相慶自近及遠嬉嬉然喜遇慈父然則政成一境名

達九重卽計冠聳豐貂旗翻建隼榮膺眞拜大洽羣
情某每聽謳謠深增禱祝伏惟照察謹狀

謝許歸覲啟

某啟早來員外郎君奉傳尊旨伏蒙恩慈念以某久
別庭闈許令歸覲者仰銜金諾虔佩玉音雖尋海島
以榮歸古今無比且望煙波而感泣去住難安伏緣
某自年十二離家今已二九載矣百生天幸獲托德
門驟忝官榮仍叨命服一身遭遇萬里光輝是以遠
親稍慰於倚門遊子倍榮於得路惟仰趙衰之冬日
深暖旅懷豈吟張翰之秋風遽牽歸思且緣辭鄉歲

久泛海程遙住傷烏鳥之情去懷犬馬之戀惟願暫
謀東返迎侍西來仰託仁風永安卑跡今卽將期理
權但切戀軒下情無任感戴兢灼涕泣之至謹奉啟
陳謝云云

謝行裝錢狀

伏蒙仁恩特賜錢二百貫又令辦行裝者謹依處分
捧領訖伏以某學虧力行事過心期燕背銜泥點污
常慙於廣廈鼈頭抃嶽低徊暗避於連鈎每慎行藏
深規躁靜豈謂謙而受益或希屈以求伸今者果逢
尊慈令將遠命榮歸故國免挈空囊比陸生南說之

橐裝倍多輝煥異孔氏東還之輜重豈慮焚燒且彼
虞卿白璧郭隗黃金徒欲耀名終非濟事曷若念其
就養熬以食貧減二十日之堂封濟數千里之家信
累載莫申其勞苦一朝頓贍於旨甘寧親而旣佩銀
章倍榮衣錦戀德而但垂珠淚願效賣綃下情無任
感恩榮抃涕戀兢惕之至云云

謝再送月料錢啟

某啟昨日軍資庫送到館驛巡官八月料錢伏緣某
將命遠方已奉公牒暫離候館卽指歸程旣蒙別賜
行裝豈令□□職俸□難領受遂便送還不知庫司

具狀申上□伏奉□□者筆飛雲鳳顯示深恩縉躍
天龍仰資厚□□遂還家之望實驚潤屋之言遠地
賤微雖有慙於 故鄉親識必致敬於金多通神
則益驗魯褒執癖則□□□伏以尊卑禮隔辭讓
無由謹依處分跪領訖下情無任感恩戀德激切徘徊
兢灼之至云云

謝賜弟棲遠錢狀

某啟某堂弟棲遠比將家信迎接東歸遂假新羅國
入淮海使錄事職名獲詣雄藩將歸故國昨者伏蒙
仁恩特賜錢二十貫者伏以崔棲遠遠涉煙波大遭

風浪僅存微命惟有空身雖志切鵲鴿竊慕在原之
義而譽慙騏驥難期得路之秋銜蘆而但喜聯行泛
梗而免虞失所今者某已榮奉使則遂寧親貨泉沾
潤之名實稱子母歸路光榮之事皆屬善人下情無
任感恩欣躍兢惕之至

上太尉別紙五首

某啟昨以鄉使金仁圭員外已臨去路尙闕歸舟懇
求同行仰候尊旨伏蒙恩造俯允卑誠今則共別淮
城齊登海艦雖慙李郭之譽免涉胡越之言遠路無
虞不假琴高之術巨川能濟惟懷傳說之恩卜情無

任感戀之至云云

又

某啟伏奉手筆批誨一行人並善將息穩風濤者俯顧微流仰窺尊念望淮海則陟遐自邇指風波則視險如夷遍灑溫言盡叨恩於挾纊口敷至懇願無愧於賣綃下情無任感激攀戀兢灼之至云云

又

伏奉尊誨藥帟子懸於船頭不畏風浪慎勿開之者仰掛青囊遠踰碧海必使天吳息浪水伯迎風既無他慮於葭津可訪仙遊於蓬島惟願往來無滯忠孝

克全萬里安流永口濟川之力百年苦節不欺臨谷之心下情無任感戴兢灼之至

又

某舟船行李自到乳山旬日候風已及冬節海師進難懇請駐留某方忝榮身惟憂辱命乘風破浪既輸宗慤之言長楫短篙實涉惠施之說雖仰資恩煦不憚險艱然正值驚波難踰巨壑今則已依曲浦暫下飛廬結茅茨以庇身慘藜藿而充腹候過殘臘決撰行期若及春日載陽必無終風且暴便當直帆得遂榮歸謹具別狀咨申伏惟云云

又

某啟自叨指使惟欲奮飛必期不讓秋鷹便能截海
豈料翻成跂鼈尙類曳泥雖慎三思而行且乖一舉
之雋旣勞淹久合具啟陳某嘗讀國語見海鳥爰居
止於魯東門之外展禽曰今茲海有災乎夫廣川之
鳥獸常知而避其災是歲也海多大風冬暘伏見今
年自十月之交至於周正月略無感發□覺温燠必
恐魯修濫祠幽改成詩靜思漢祖之興歌大風可懼
遙想田橫之竄跡絕島難依遂於登州近浦止泊籠
鵠無失藩羊自安惟願時然後行必當利有攸往泛

艤艘而不滯指渤澥而非遙冀申專對之能早遂再
來之望伏惟云云

祭嶼山神文

維年月日新羅國入淮南使檢校倉部員外郎守翰
林郎賜緋銀魚袋金仁圭淮南入新羅兼送國信等
使前都統巡官承務郎殿中侍御史內供奉賜緋魚
袋崔致遠等謹以清酌牲牢之奠敬□懸于嶼山大
王之靈竊以昔辨方員始分清濁融作江海結爲山
岳石戴土而土戴石小者礪而大者礪然而罕有威
神靜無稜角與堆阜而相接見邱陵之可學惟靈磊

磊落落高臨鯤壑巉巉岳岳俯壓鯨潭上則爲雲霧
縈纏之骨下則爲波濤激射之窟朝則迎金烏而前
出夜則送銀蟾而後沒是以峻德能彰乎東夏西夷
玄功不假乎南儵北忽則彼織女之機倚河漢秦帝
之橋架溟渤徒徇其名莫勞我形每謂蘊藏其片玉
豈惟廁列於雙瓊遂使往來者虔度英靈祈禱者盡
寫精誠旣蘋蘩之可薦信黍稷之非馨今者仁圭等
久銜遠命致遠也始奉殷聘喜歸舟之旣同仁遊轡
之能并不患胡越之意殊寧慙李郭之名盛去歲初
冬及東牟東屬以滄流向遠玄律將窮浪形訇訇而

鷁難浮艦風響羸羸而鵠恐辭籠遂艤刻木聊安斷
蓬一昨雖迎端月猶懼俊風延頸而待逢候燕回眸
而送盡歸鴻方期利涉龜從筮叶直指雞林輕浮芥
葉豈輸馳馬之號願較秋鷹之捷遠詣靈峯難尋壽
宮但覩其青蓮倒蘸於巨浸碧螺高柱於晴空仰威
靈之聳塵外想影響之飄雲中於是潔饋饌擇肥醲
酒醴斯醺牲牲粗豐謹賚薄禮敢覬陰功伏惟大王
潛施呼喻密降指蹤使波神拱手川后歛容楚師之
南風且競鄭伯之東道豁通照水鏡之心旣分妍醜
擘土囊之口無雜雌雄則可朝穿汗漫暮截鴻濛去

採石華必同謝運行吟肉脯免效張融加以某臨川
自審登木增憶昔雪作夜光冰爲夕飲幾年獨勵
於鼓篋今日方期於扇枕將問荊州之絹忝披會稽
之錦見寵若驚心如捧盈雖智有不逮而時然後行
况賚御筆慮滯王程今則裹裝旣飾儼有行色翫淑
景以歌吟汎安流於瞬息惟托大王之風早歸君子
之國俾傳帝命無曠神職尙饗

進詩賦表狀等集狀

右臣自年十二離家西泛當乘桴之際亡父誠之曰
十年不第進士則勿謂吾兒吾亦不謂有兒矣往勤

哉無墮乃力臣佩服嚴訓不敢弭忘懸刺無違冀諧
養志實得人百之已千之觀光六年金名榜尾此時
諷詠情性寓物名篇曰賦曰詩幾溢箱篋但以童子
篆刻壯夫所慙及忝得魚皆爲棄物尊以浪跡東都
筆作飯囊遂有賦五首詩一百首雜詩賦三十首共
成三篇爾後調授宣州溧水縣尉祿厚官閑飽食終
日仕優則學免擲寸陰公私所爲有集五卷益勵爲
山之志爰標覆篲之名地號中山遂冠其首及罷微
秩從職淮南蒙高侍中專委筆硯軍書幅至竭力抵
當四年用心萬有餘首然淘之汰之十無一二敢比

披沙見寶粗勝毀瓦畫墁遂勒成桂苑集二十卷臣
適當亂離寓食戎幕所謂饘於是粥於是輒以耕爲
筆目仍以王韶之語前事可憑雖則偃僂言歸有慙
鳧雀旣墾旣耨用破情田自惜微勞冀達聖鑒其詩
賦表狀等集二十八卷隨狀奉進謹進

以上桂苑筆耕

上太師侍中狀

伏聞東海之外有三國其名馬韓卞韓辰韓馬韓則
高勾麗卞韓則百濟辰韓則新羅也高勾麗百濟全
盛之時強兵百萬南侵吳越北撓幽燕齊魯爲中國
巨蠹隋皇失馭由於征遼貞觀中我太宗皇帝親統

六師渡海恭行天罰高勾麗畏威請和文皇受降回
蹕我武烈大王請以犬馬之誠助定一方之難入唐朝
謁自此而始後以高勾麗百濟踵前造惡武烈入朝
請爲鄉道至高宗皇帝顯慶五年勅蘇定方統十道
強兵樓船萬隻大破百濟乃于其地置扶餘都督府
招輯遺氓泄以漢官以臭味不同屢聞離叛遂徙其
人於河南總章元年命英公李勣破高勾麗置安東
都督府至儀鳳三年徙其人於河南隴右高勾麗殘
孽類聚北依太白山下國號爲渤海開元二十年怨
恨天朝將兵掩襲登州殺刺史韋俊于是明皇帝大怒

命內使高品何行成太僕卿金思闐發兵過海攻討
仍就加我王金某爲正太尉持節充甯海軍事雞林
州大都督以冬深雪厚蕃漢苦寒勅命回軍至今三
百餘年一方無事滄海晏然此乃我武烈大王之功
也今某儒門末學海外凡材謬奉表章來朝樂土凡
有誠懇禮合披陳伏見元和十二年本國王子金張
廉風飄至明州下岸浙東某官發送入京中和二年
入朝使金直諒爲叛臣作亂道路不通遂于楚州下
岸邈迤至揚州得知聖駕幸蜀高太尉差都頭張儉
監押送至西川已前事例分明伏乞太師侍中俯

降台恩特賜水陸券牒令所在供給舟船熟食及長
行驢馬草料并差軍將監送至駕前幸甚

東國
通鑑

